

Nhupi Wooreera wa Yesu Kristu Wantikhiye ni Marku

Yohani Mpatisa nalalyaa

Mt 3.1-6; Lk 3.1-6

¹ Wiipaceroni wa Nhupi Wooreera wa Yesu Kristu, Mwanawe Nluku. ² Ohaantikhiya ni nnapiyu Isaya: Kimmonrumiha uhoolo wa mayanhupi aka,

nohala wulokiherani iphiro.*

³ Ncu ninkhuwa ntakhwani,

Nlokihe iphiro ya Apwiya, mookole mittala.*

⁴ Ciicale, Yohani Mpatisa phooneliye ntakhwani wiira eetthucihe opatiso wo urukunusa nrima wiira itaampi cileveleliye. ⁵ Yaanamwikamela atthu othene olapo ya Yutteya, na atthu ankhala uYerusalemu, ni yaanapatisiya ni ule umooloko Yorttani, alaphaka itaampi caya. ⁶ Yohani awara ikuwo yo mapururu onkamira, eethukelaka nyununi mo nrapala, yoolya awe yari mattettente ni urawo wo ntakhwani. ⁷ Ni wowaalaka anaahimya coo: Uttuli waka mi nawa nkinaku rina ikuru impwaha yawaka, ni mi akimphwanela wooroma wiira kitthukule miripwe cokwakwatta cawe. ⁸ Mi kinawuupatisani ni maasi, nanso Ule naahala wuupatisani muNnepa Nttakattifu.

Yesu napatisiya ni nathokociya

Mt 3.13-17; 4.1-11; Lk 3.21-22; 4.1-13; Yohani 1.32-34

⁹ Waheranyaa, mahuku ale, Yesu awaaka ukhuma uNasaree yo Kalileya, mpaka upatisiya ni Yohani umooloko Yorttani. ¹⁰ Wakhumawe mmaasini mmo,

* 1:2 Malakiya 3.1 * 1:3 Isaya 40.3

ahoonna irimu ihulyaka, ni Nnepa, woonnya toko ikhunnta inkhuruwelaka. ¹¹ Ni ukhuma wirimu nineewiya ncu nnohimya: We uri Mwanaka oofentiya, nokiphela nrima. ¹² Wahoolo Nnepa Nttakattifu wahoonrweha utakhwani, ni ¹³ ahokhala wonwo mahuku arupayini, ni ahothokociya ni Sotwani; ni cahawo wonwo inama cowoopiha, ni ancelo yahonkavihera.

Owiitthuca oopacera a Yesu

Mt 4.12-22; Lk 4.14-15; Lk 5.1-11

¹⁴ Utthukiya wawe Yohani, Yesu akenle uKalileya, wahimerya atthu Nhupi Wooreera wa Nluku, eeraka: ¹⁵ Ukati uhophiya ni ciicammo Omwene wa Nluku uhophiya. Nrukunuseke nrima, nkupalelaka Nhupi Wooreera. ¹⁶ Aviraka nceresere ntthiya no Kalileya, ahomoona Simoni ni nhimaawe Anteree avonyeraka matthavi aya mpaharini mmo, nlattu yaari mayototha ihopa. ¹⁷ Yesu aheerela: Nkitthare Mi, ni Mi kim-mowupankani mayowatotha atthu. ¹⁸ Ahiyaka nanaanoru matthavi aya, yahontthara Yesu. ¹⁹ Napwahile vakani, ahomoona Yakopu, mwana a Sepeteu ni nhimaawe Yohani, alokihaka nkalawani matthavi aya pweehanaka nananoru. ²⁰ Ni ale yahonhiya Sepeteu athumwanaya ni mayanteko aya, yahontthara.

Nlopwana o nnepa woonanara

Lk 4.31-37

²¹ Yaanarwa uKafarnaum. Nihuku no Ntivela ahokela nnsinakokani, ni aheetthuciha atthu. ²² Na atthu othene yaanawumiya mwaano ni miiitthuciho cawe, nlattu aheetthuciha toko ntthu nolamula ni khari toko mayowan-tikha. ²³ Ahaawo nnsinakokani mmo ntthu arina nnepa woonanara, apacile ukhuwa: ²⁴ We urinani ni hi, Yesu o Nasaree? Wawenle unikwanyulaca? Mi kihocuwela wiira uri Nttakattifu a Nluku. ²⁵ Yesu ahonkuphula,

eeraka: Omaale we, ni ukhume wantthu ula. ²⁶ Vano, nnepa woonanara, unantathile ni ikuru, ukhuwacaka, wahokhuma wantthu ule. ²⁷ Othene yahotikhinaca, mpaka ukohana ayayoru: Isiyani ila? Moone meetthuciho oon-aanano, uromoliya ni nlamulo mpaka ulamulela minepa coonanara ni nnya cinamwiiwelela. ²⁸ Ni ncina nawe nahorumannya nttette the wothene, ilapo yo Kalileya.

Yesu nawavoniha aretta enci

Mt 8.14-17; Lk 4.38-41

²⁹ Akhumaka unsinakoka ahokela mpani mwa Simoni ni Anteree, wamoca ni Yakopu ni Yohani. ³⁰ Amaathyawe Simoni yaanawerenya wakorini, awerenyaka irutthu yothene, ni nananoru yahonhimerya ca iretta ila. ³¹ Attameryaka, Yesu ahaavarela ntata mpaka waawusa. Iretta yahaahiya, na ale yahopacera wakaavihera. ³² Ucoocilo, ncuwa ninakwattuwile, yahomwiihera aretta na ale yahoosiya ni nnepa woonanara, ³³ na atthu othene owatthokoni yahothukumana wankhora. ³⁴ Ahaavoniha aretta enci, yahoosiye ni coowerya, ni ahoomola minepa coonanara cinci; nanso khahiya wuulumaca minepa nlattu yaanancuwela.

Yesu nahimyaca Nhupi Wooreera

Lk 4.42-44

³⁵ Wicisuru, uhinasa ahoonwa ni ahokhuma; phurwaka ntakhwani wiira aswali. ³⁶ Simoni, na ale yaari ni Yesu yahontthara. ³⁷ Umphwanya waya, yahomwiirela: Atthu othene anawuphavelani. ³⁸ Nanso ahaakhula: Nirwe ncoko nkina, itthoko co vakhiviru, neetthucihe wonwo, nlattu wo yela phikumenlyaka. ³⁹ Ni ahorwaa ilapo yothene yo Kalileya, eetthucihaka mmasinakokani, ni oomolaka minepa coonanara.

Yesu ahonvonihani ntthu o makuttula

Mt 8.1-4; Lk 5.12-16

⁴⁰ Ntthu o makuttula ahonrwela Yesu ni ankhoromelaka ahonlepela: Watthunaka vale unawoorya ukivoniha. ⁴¹ Amoonelaka ikiriri, Yesu ahonthatela ntata mpaka unkwanya, eeraka: Kinatthuna, uvone. ⁴² Nananoru, makuttula yahonhiya, ni irutthu yahokhala toko khailayi. ⁴³ Ni Yesu ahonleeha phunlakaka, ni moolumo ala: ⁴⁴ Ukiwe ahinhimerye ntthu itthu ila. Nanso upacera urwaa wamayasataka ni uvelelihe itthu ilamuliye ni Musa; nlattu wa atthu anhapihiya makuttula, wiira akhale saahiti aa. ⁴⁵ Ule, mweeco, urwaa wawe ahopacera ulattula ni uhimya itthu yeeranele, mpaka Yesu uhoorya ukela ooniyaka mmawaani phukhalaka ntakhwani; na atthu olapo ile yaananrwela.

2

Yesu ahonvonihani ntthu oowuntakyaa

Mt 9.1-8; Lk 5.17-26

¹ Anavinre mahuku vakani, ni Yesu naturuwile uKafarnaum wahorumanyaa wiira ri uwaani. ² Yahothukumana atthu enci, mpaka uphunyanana wankhora, ni Yesu aheethuchiha moolumo. ³ Vano yahomwiihera ntthu oowuntakyaa, akusiye na atthu acese. ⁴ Ukhala wiira khayooroora unkusa mpaka waryawe, nlattu wo mphwinko, yahokhunula nivatho nipuro naryawe Yesu, ni ciicale, anahunle iparo, yahokurusela nrepa naryawe ntthu oowuntakyaa. ⁵ Wowoona ukupali waya atthu ale, Yesu ahomwiirela ntthu oowuntakyaa: Mwanaka, itaampi caa ciholeleliya. ⁶ Wonwo mweeco, yahoonkoma mayowantikha vakani yaakakaka munrimani mwaya: ⁷ Nlattuni, Ule uulumacaka co? Nakufuru. Noorya tipani ulevelela itaampi, hiri Nluku paahi? ⁸ Yesu, nanso acuwelaka moopuwelo aya mpaka ahaakoha: Nlattuni muopuwelaka ciicale munrimani mwinyu? ⁹ Itthu

yootepa urika phivi, umwiirela oowuntakya, Itaampi caa ciholeveleliya, atthuna umwiirela, Wunwe, ukuse nrepa naa ni weette? ¹⁰ Vano paahi; wiira ncuwele wiira Mwanawe Pinattamu haana ikuru vathiva yolevelela itaampi, ¹¹ kinawuulamula amwaacaka ntthu oowuntakya ukuse nrepa naa ni urwee uwaanyaa. ¹² Ntthu ule ahoonwa, ahokusa nrepa nawe ni ahokhuma ooniyaka na atthu ale othene, mpaka othene wumiya mwaano, ni yaananttottopela Nluku yiiraka: Khaninoona itthu co nikhalakaru.

Yesu namwiihana Levi

Mt 9.9; Lk 5.27-28

¹³ Imaara ikina tho ahokhumela vate mphante wo ipharyaa; ni mphwinko wa atthu othene wahontthara, Ule eetthucihaka. ¹⁴ Nanso aviraka uyo ahomoono Levi, mwanawe Alfeu nonkomile inupa yowaakheleliya nsoko, ni ahomwiirela: We, ukitthare Mi. Ni Levi ahonwa anttharaka Yesu. ¹⁵ Nari wamoca, itthoko ya Levi, may-oliviha nsoko enci na atthu ookosakosa yahoonkomaca wameeca wamoca ni Yesu ni uwiitthuca awe, nlattu khayaamala urunwa atthu yaantthara. ¹⁶ Mayowantikha yanrumelelihana ni mafarisi, amoonaka ulya na atthu ookosakosa ni mayoliviha nsoko, yaheerela uwiitthuca awe: Nlattuni, nalya na atthu ookosakosa? ¹⁷ Yesu ee-waka cothene ahaakhula: Kahiwena akumi phimmwavya tothoro, nanso, aretta. Mi akiwenle weehana atthu aattakattifu, nanso atthu ookosakosa.

Mwaha wootthuka

Mt 9.14-17; Lk 5.33-39

¹⁸ Owiitthuca a Yohani ni mafarisi yaantthuka, yahowa unkoha Yesu: Owiitthuca a Yohani ni mafarisi anatthuka ni uwiitthuca aa ahitthukaka isiyani? ¹⁹ Yesu ahaakhula: Asimpwana awe mayothela anawoorya utthuka, mayothela nari na ale? Mahuku othene ankhalaya

wamoca ni mayothela khanoorya utthuka. ²⁰ Anaahala uphiya mahuku anhalaya waakhiya mayothela, vano phankelaya utthuka. ²¹ Khaawo neesera icaapha yonaanano ikuwoni yookhalayi, nlattu icaapha yonaanano inatepereriha mphantte wookhalayi, ni nikhwata ninatepa wunnuwa. ²² Ni khaawo nohela ivinyu yonaanano mmapikani ookhalayi, ahelaka vale, ivinyu inaahala upwesa mapika ookhalayi, ni ivinyu inarihakyya wamoca ni mapika. Nanso ivinyu yonaanano inheliya mmapikani oonaanano.

Yesu ni ntivela

Mt 12.1-8; Lk 6.1-5

²³ Nihuku nimoca no ntivela Yesu anavira mmamat-tani na owiitthuca awe. Yeettaka mphironi, owitthuca awe yahoonta ncasi. ²⁴ Mafarisi yahontthara, yiiraka: Nkoono, nlattuni ale apankaka itthu yowatelihiya upanka nihuku no ntivela? ²⁵ Ahaakhula: Khannasoma itthu yapankilyawe Taviti, wammoonlyawe itala, ule na atthu yarinawe? ²⁶ Wakenlyawe inupa ya Nluku, ukati wa mayasataka muulupale Apiyatari, ni walilyawe mikatthe cootakattifihiya coolamuliya ulya mayasataka paahi, ni ahaavaha atthu yarinawe? ²⁷ Ni ahopwahera: Ntivela nihopankeliya ntthu, ni kahiwena ntthu phipankeliye ntivela. ²⁸ Mwanawe Pinattamu phi mwaneene ntivela.

3

Yesu ahonvonihana ntthu oonririya ntata.

Mt 12.9-14; Lk 6.6-11

¹ Yesu ahokela tho nnsinakokani. Ahokhala wonwo ntthu oonririya ntata. ² Vano ale yaananhottela wiira amoone ammoonihaka nihuku no ntivela wiira ankasari. ³ Yesu ahonhimerya ntthu arina ntata noonririya: Wunwe ni uwe iriyari ila va. ⁴ Wahoolo ahaakoha: Inoleveliya,

* 2:26 1Sm 21.1-6

nihuku no Ntivela, upanka itthu yooreera atthuna itthu yoonanara, woopola ukumi atthuna uhiya uharipwiyaka? Ale yahomaalaca. ⁵ Vano, awehaka ni urusiya, ni ummweryaka nrima nlattu woturumala mirima caya, ahomwiirela ntthu: Wookole ntata. Ahookola ntata ni nna nahovona. ⁶ Wakhumilyaya, mafarisi yahothukumana na aHerotiyano wiira avaanele mamwiivelo.

Mphwinko muulupale unari nceresere ntthiya

⁷ Yesu ahorwaa untthiyani na owiitthuca awe, atthariyaka ni mphwinko muulupale wakhuma uKalileya, ni Yutteya, ⁸ uYerusalemu, ultumeya, ukhopela Yorttani, ni nceresere Tiro ni Sittoniya. Ahophwanyinya ni mphwinko muulupale, wewiilyaya itthu yaapankawewe. ⁹ Ahaahimerya owiitthuca awe, anlokihere ikalawa yaankani, wiira hiphunyererihye ni mphwinko uyo. ¹⁰ Woonaa ahaavoniha atthu enci, ni nlattu weetthu ila, ale yanawaaninya ni ikwerere wiira ankwanye. ¹¹ Minepa coonanara, wamoonaya, caanankhoromela wamiithoni wawe ni caanakhuwa: We uri Mwana a Nluku. ¹² Ule nanso anawaateliha wiira ahicuwelihe.

Yesu naweehana arumeyi khumi na eeli

Mt 10.1-4; Lk 6.12-16

¹³ Wahoolo ahowela mmwaakoni, ni aheehana ale yatthunyawe, na ale yahomwaattamerya. ¹⁴ Ahaathanla khumi na eeli phwaavahaka ncina na amitthenka wiira yakhaleke ni Uyo, ni aarume, wiitthuciha, ¹⁵ ni yaphwanyeke ikuru yo woomola minepa coonanara. ¹⁶ Ahaathanla khumi na eeli ala: Simoni, ammahilyawe ncina na Peturu, ¹⁷ Yakopu, mwanawe Sepetteu, ni Yohani nhimaawe Yakopu, ammahilyawe ncina Powanerce, man-aaya asaana utari; ¹⁸ Anteree, Filipe, Partimeu, Mateu, Tomee, Yakopu mwanawe Alfeu, Tateu, Simoni Selote, ¹⁹ ni Yutta Iskariyoti, anthumihile Yesu.

Yesu ni Sotwani

Mt 12.22-32; Lk 11.14-23

²⁰ Waphilyaya uwaani, mphwinko wa atthu wahothukumana tho, mpaka wahinoryaya ulya. ²¹ Ni amawaawe, wiiwawaya itthu ila, yahokhuma wiira ammare, nlattu yeeriya: Hoolociya. ²² Ni mayowantikha, yakhuruwenle o Yerusalemu yahohimya: Hovariya ni Peelsepu. Ni thotho. Nawoomola minepa coonanara ni ikuru ca mwene a minepa coonanara. ²³ Vano Yesu aheehana ni wahimerya mmalikaniheroni: Noorya cani, Sotwani umoomola Sotwani? ²⁴ Omwene wakawaniyaka, omwene ule khinoorya ukhala. ²⁵ ni inupa yakawanihiyaka, inupa ile khinoorya ukhala. ²⁶ Phimaana, akhalaka Sotwani eecanihaka ikhotto mwaneene eekawanihaka, ni khanoorya ukhala tho, homala. ²⁷ Khaawo noorya ukela inupa ya ntthu ookhomaala ni unhukhela mihakhu cawe woohipaca ummara phooryaka unhukhela wahoolo. ²⁸ Khweeli kinawuhimeryani: Itaampi cothene ni ikufuru cothene cinkhala coromoliya na atthu, cothene cimmoleveliye, ²⁹ nanso, ntthu nohala ukufuru Nnepa Nttakattifu khammwa uleveliye akhalakaru; nowookhala ni itaampi awe mahuku othene. ³⁰ Ahaahimerya itthu ila nlattu yahimenrye: Ule navariya ni nnepa woonanara.

Alokwawe eekhweeli Yesu.

Mt 12.46-50; Lk 8.19-21

³¹ Vano yahophiya anumwane na asihimaawe, ni anemenle utaa, yahaaruma atthu umwihana. ³² Mphwinko wa atthu wahoorkoma ntotho wawe, atthu yahonhimerya: Ahaawo vate anumwana na asihimaa, anawuphavela. ³³ Ahaakhula: Amanyi ni asihimaaka phapani? ³⁴ Ni athetulaka miitho mwaatthu ale yanrukurenrye, aheera: Ala pha manyi na asihimaaka.

³⁵ Ntthu nopanka utthuna wawe Nluku, ule phi nhimaaka, mwanrokoraka ni amanyi.

4

*Nlikanihero no mayowaala**Mt 13.1-9; Lk 8.4-8*

¹ Ahopacera tho wiitthuciha nceresere ntthiya. Mphwinko muulupale wahothukumana ntotho wawe, phimaana ahowela nkalawani ni ahoonkoma mmwe, phukhalaka mphwinko woonene. ² Anaweeetthuciha citthu cinci mmalikaniheroni ni anawahimerya mmeetthucihoni mwawe: ³ Mmiriyane. Mayowaala ahokhuma arwaka uwaalani. ⁴ Waalaawe, ipyo ikina yahomorela nceresere iphiro ni yahowaca asanuni, yaholya. ⁵ Ipyo ikina yahomorela wakokotthoni, wonwo wahakhanle itthaya yinci, khipicile umela nlattu itthaya khayaakenle uttayi. ⁶ Nanso, ncuwa, ukhuma waya, yahopahiya, nlattu wohikhalana itthaya yinci mitithari cahooma. ⁷ Ikina yahomorela wamwiwani, ni miwa cahoonuwa, cahomirya ipyo ni khayeemile. ⁸ Ikina yahomorela itthaya yooreera ni yunuwaka, ni inarenre, yaheema, ni wuncereriya mpaka ukhala talathini, sitiini ni iminya khila ipyo. ⁹ Ni ahopwahera eeraka: Urina manyaru uwiwelela, eeweke.

*Isariya yo nlikanihero**Mt 13.10-23; Lk 8.9-15*

¹⁰ Nahanle veekha, atthu yanrukuriya wamoca ni owi-itthuca awe khumi na eeli yahonkoha manaaya nlikanihero nne. ¹¹ Ahaakhula: Nyu nhovahiya ucuwelaca ikano yo omwene wa Nluku, nanso, atthu ari utaa citthu cothene anahimeriya ni malikanihero, ¹² wiira yoonaka,

yoone, ni ahicuwelele; yiiwaka, yiiwe, ni ahiiwehe wiira ahirukunuse mirima, aleveliyaka itaampi caya.*

Yesu nataphulela nlikanihero no mayowaala

¹³ Ni ahopwahera: Khanneeweeha manaaya nlikanihero nna? Nnohala mweeco, wiitthuca cani malikanihero makina ayo? ¹⁴ Mayowaala nawaala nuulumo, ¹⁵ ari nceresere iphiro, pha ale yahimerye nuulumo, aneewile nuulumo. Sotwani nawa waatamiha nuulumo naaliye. ¹⁶ Ciicammo, ale yaakhenle ipyo mapuro ookokoottho, pha ale yiinre aneewile nuulumo, woohipica anawaakhelela ni nrima wootteeliya, ¹⁷ nanso kharina mitithari mwaale, khankhala nthiti ni yawaaka mahuviho, atthuna yomolanihaciyaka nlatu wo nuulumo, wohipica anattittha. ¹⁸ Ahaawo akina, anaakhela nuulumo mapuro o miiwa. Ala anawiiwa nuulumo, ¹⁹ nanso nlatu woramela itthu yo nttuniyani, wothokociya ni mihakhu ni citthu cikina cinonlelaya, cinakela munrimani mwaya anattitthiha nuulumo ni khaneema. ²⁰ Atthu anakhela nuulumo itthaya yooreera pha ale aneewa nuulumo, anaakhelela, aneewa mpaka wiima ni wincereriya talathini, sitiini ni iminya khila ipyo.

Nthuko woomwaleela

Lk 8.16-18

²¹ Ahaahimerya tho: Pooti inaweesiya isamaninya nhina mwaya itthuttu atthuna vathi waya nkori? Keera ineesiya waculu mmutto? ²² Nlatu khiiwo yovithiya ihinhala wooneleliya, ni khiiwo yowipithya ihinhala ukhumela woonene. ²³ Ntthu akhalanaka manyaru oowiwelela, eeweke! ²⁴ Ni ahopwahera: Mmiriyaneke ratta itthu ineewenyu. Nnowophimiya ni itthuttu inhalenyu uphimela, ni thotho nnowowincereriya. ²⁵ Vano ntthu

* 4:12 Isaya 6.9-10

rina, nowowuncereriya, ni ntthu hirina, nowowaakhiya, mpaka citthu cirinawe.

Nlikanihero no ipyo

²⁶ Ni anawiira: Omwene wa Nluku uri toko ntthu avonyenre ipyo awe vathi. ²⁷ Arupe, unwe, uhiyu ni uthana, ipyo inamela ni inawunuwa, ule woohicuwela cani. ²⁸ Itthaya inavaha veekhaya, woopacera ntathi, wahoolo ncasi, ni umwiisoni ncasi nocara meelee. ²⁹ Ni yowi-ima yattokothhaka, naahepha nlattu wahophiya ukati wohephiya.

Nlikanihero ni inuku yo nrale

Mt 13.31-32; Lk 13.18-19

³⁰ Vano aheera: Ninhala ulikanihera ni isiyani omwene wa Nluku? Atthuna ninhala utaphulela ni nlikaniheroni? ³¹ Uri toko inuku yo nrale, ineera inaliye vathi, iri yootepa uyeva mweenuku cothene; ³² nanso, yaaliyakaru, inawunuwa, inathatuwa mwiri muulupale woopwaha miri co mmattani ni inamwarya miritta caya mpaka asanuni o wirimu woorya uteka ipuuru muntthucini mwaya. ³³ Ni malikanihero menci toko ala Yesu anaweeetthuciha nuulumo, toko woonawe wiira anawiiweha. ³⁴ Khoolumacera woohikhala ni malikanihero; nanso uyo anawataphulela cothene owiitthuca awe anari veekhaya.

Yesu nammaaliha naphuvo.

Mt 8.23-27; Lk 8.22-25

³⁵ Nihuku nne, unaripenle, ahaahimerya: Nrwee nilapuwele ukhopela. ³⁶ Ahiyaka miphwinko, owiitthuca yahonkusa, toko caryawe nkalawani, ni cahommelela ikalawa cikina. ³⁷ Vano ahokhumelela naphuvo muulupale ophyoo ni mawiimpi yanawicattakanihaca ni ikalawa mpaka yahala vakani ucara maasi. ³⁸ Yesu,

nari mphantte wottuli wokalawa, anarupa naphiten-rye nsawu. ³⁹ Yahoommusa ni umwiirela: Mwalimu, khunoono wiira ninakumpwela? Unwaka, ahola-mulela iphyoo ni aheerela ipahari: Imaale, ihittinke! Iphyoo yahomaala, ni ipahari yothene yaheera riya-riya. ⁴⁰ Wahoolo ahaahimerya: Nlattuni nkhalaka atthu oowoova osilili? Nhikupaliki? ⁴¹ Yanawoova venci ni yaanahimeryana: Tipani Yoola? Hata iphyoo, ni ipahari cinamwiiwelela?

5

Yesu ahonvoniha ntthu ovariya ni minepa

Mt 8.28-33; Lk 8.26-34

¹ Yahophiya nikhopela nikhwaya ntthiya, ilapo yo Yeraseno. ² Yesu nalapuwile ahosiceriya ni ntthu aakhuma umahiye, avariye ni nnepa woonanara. ³ Akhala umahiye, ni khaawo oorya ummara, mena vakani unt-thuka ni unyolo, ⁴ nlattu imaara cincin ahotthukiya ni unyolo mpaka wuntakaca unyolo ni unyakataca ikatiyato; khaawo oorya ummoniha. ⁵ Mahuku othene anaweetta, uthana ni uhiyu mmarekhano ni mmyaakoni, akhuwaka ni eerakalihaka ni maluku. ⁶ Amoonaka Yesu uttayi, ahotthimakaca ni ahonkhoromela ni ⁷ ahokhuwa ni ncu nowirunya: Nyu nrinani ni miyano, Yesu Mwana a Nluku Ooculu. Nhikoopopihe! ⁸ Ni khweeli, Yesu anamwiirela: Ukhume mwantthuni mu, nnepa woohiloka. ⁹ Wahoolo ahonkoha: Ncina naa tipani? Ahaakhula: Mphwinko phi ncina naka, nlattu niri enci. ¹⁰ Ni yahonlepela ankhany-ereriha wiira ahomoliye nttetthe ule. ¹¹ Caanalya vano ikuluwe nceresere mwaako, ¹² ni minepa coonanara cahonlepela Yesu: Nnilamulele nakele nkuluweni mmwe. ¹³ Yesu ahorumelela, ni nenna nna minepa coonanara cahokhuma wantthuni ni cahokela nkuluweni, ni nikhoto

nne nari toko ikuluwe elufu piili (2000) naheevonyera muntthiyani ni nahottittha. ¹⁴ Ahakheli yahotthawa ni yahovira alattulaka mmawaani; na atthu enci yahowa woona itthu yeeranele. ¹⁵ Waphiyaya nipuro naryawe Yesu, yahomoono ntthu avariye ni minepa coonanara noonkomile, nawanre ni nakhalanne ankhili, ni yahoova. ¹⁶ Asaahiti a ntthu oovariya ni minepa coonanara ni itthu yeranele ni ikuluwe yahottonka itthu yeranele. ¹⁷ Vano yahoonlepela Yesu wiira athame ilapo aya. ¹⁸ Yesu ahoturuwela okalawani; ni ntthu avariye ni minepa ¹⁹ Yesu khandthunihenre, nanso ahomwiirela: Urwee uwaanyaa, wamawaa ni wattonkacere citthu cothene cupankenlyaya Apwiya, ni toko ciwoonenlyaya ikiriri. ²⁰ Ahokhuma wonwo, ni ahopacera uTekapoli itthu yampankenlyawe Yesu, na atthu othene yahotikhinaca.

Ulepela wa athumwane ntthu

Mt 9.18-19; Lk 8.40-42

²¹ Yesu nalapuwile ntthiya ni ikalawa, ni neemenle nceresere ntthiya wahothukumana mphwinko muulupale wa atthu. ²² Ahophiya vano muulupale o nsinakoka, eehaninya Cayro, ni umoono wawe Yesu, ahonkhoromela, ²³ ni ahonlepela ankhanyereriha: Mwanaka mwanthiyana hanle vakani ukhwa; uwe unthatele matata akhale nkumi.

Uvonihya wa nretta

Mt 9.20-22; Lk 8.43-48

²⁴ Yesu ahommeleela phutthariyaka ni mphwinko muulupale wamphunyereriha. ²⁵ Vano, nthiyana mmoca awuva iphome iyakha khumi na piili, ²⁶ ni anawee-tihya venci mmatatani mwaya mayoovoniha enci, ni arihile mihakhu cawe cothene, nanso woohiphwanya nafasi, hata iretta awe yaanavira etepacaka. ²⁷ Neewile

ca Yesu, ahotakaneela ni mphwinko, ni awaaka utuli wawe ahonkwanya nihancu nawe; ²⁸ aheecirela mweeco: Mena kakwanyaru cowara cawe, kimmovona. ²⁹ Nananoru iphome yaheemela, ni ahoona mwirutthuni mwawe wiira ikwerere awe ihovona. ³⁰ Nenna nna, Yesu, oonaka wiira ikuru awe yahokhuma mwirutthuni mwawe, ahorukunuwela mphwinko akohaka: Kikwanyile tipani? ³¹ Owitthuca awe yahomwiirela: Unawoona wiira miphwinko cinawuphonyereriha miphantte cothene, ni unakoha: Akikwanyile tipani? ³² Nanso Yesu ahoweha nceresere aphaavelaka umoona ntthu apankile itthu ile. ³³ Vano nthiyana ahocuwela ciheeranya mwirutthuni mwawe oovaka ni athukumelaka ahokhuma ahonkhoromela Yesu ni ahonhimerya citthu cothene. ³⁴ Ni ule ahomwiirela: Mwanaka, ukupali waa uhwoopola. Urwee ni nnema ni uvone ikwerere aa.

Wunwelelihiya wa mwanawe Cairo

Mt 9.23-26; Lk 8.49-56

³⁵ Yesu uulumacaka ninlelo yahowa atthu akina akhumaka inupa awe muulupale o nsinakoka phwiiraka: Mwana aa hokhwa. ³⁶ Yesu, nanso, neewile moolumo ale, ahomwiirela muulupale o nsinakoka: Uhituthuwe, ukupaliki paahi. ³⁷ Ahaateliha othene wiira: Hikivelele ntthu, hikhanle Peturu, Yakopu ni Yohani, nhimaawe Yakopu. ³⁸ Uphiya waya uwaanyawe muulupale o nsinakoka, Yesu aheewa ikuttho yuulupale ya atthu enci yunlaka mpani. ³⁹ Ni akelaka, ahaahimerya: Ikuttho ila wunla nwe isiyani? Mwana uyo kakhwile, narupa paahi. ⁴⁰ Nanso atthu ale yaananyaa, Yesu ahaakumihera utaa atthu ale othene ni aakusaka athumwane na anumwane, na ale yammenle, yahokela mpani mwataleliye mwanamwane. ⁴¹ Ni ammaraka ntata, aheera: Mwanaka kinawulamulela,

wunwe. ⁴² Nananoru mwanamwane ahoonwa ni ahopacera weetta, ari mweeco, ni iyaakha khumi na piili. Othene yahooma mwaano. ⁴³ Yesu ahaalepela wiira itthu ile ihicuweliye ni ntthu, ni aholamula uvahiya yoolya mwanthiyana.

6

Yesu nakhottiya wakheleliya uNasaree

Mt 13.53-58; Lk 4.16-30

¹ Ukhuma wawe wenwe, ahorwaa wamoca ni owi-itthuca awe. ² Nihuku no ntivela ahopacera wiitthucihana nnsinakoka na atthu enci yamwiiwa, wanawooma mwaano ni yaanahimya: Inonkhuma vayi itthu ila ni ucuwelani uno uvahiyawe uno? Cinopankya cani cotikineeha nya ni ntata nawe? ³ Kahi nkarapintero, mwanawe Mariya, ni nhimaawe Yakopu, Yosefi, Yutta ni Simoni? Ni asirokorawe khari ni hi? Yahoviruwaca. ⁴ Yesu aheerela: Namilohi notarawiya uwaanawo paahi, waama wawe ni wapuwani wawe. ⁵ Ni wonwo khoonrye upanka cotikineeha hata mena. Ahaavooniha aretta vakani paahi, athatelaka matata. ⁶ Ahotikhinaca uhikupali waatthu ale. Vano ahoviravira itthoko co wattamana eetthucihaka wonwo.

Amitthenka anarumiya

Mt 10.5-15; Lk 9.1-6

⁷ Aheehana khumi na eeli, ni ahopacera waruma eeli eeli, ni ahaavaha ikuru yolamulela minepa coonanara. ⁸ Ahaalamulela wiira ahikuse itthu yoothumiri ni iphiro, wala nkatthe, wala nrupa, mena nsurukhu nyununi, akuse ikopo paahi. ⁹ Aware ikwakwatta ni ahiwye ihancu piili. ¹⁰ Ni ahaahimerya tho: Mwakelaka inupa, nkhale wonwo mpaka wunwa nipuro nno. ¹¹ Ni mwahaakheleliyeke nipuro nno, na atthu ale yahiwiwekeni, woothama vale,

nkukutthe ntthupi no manyaa enyu, wiira ikhale itthu inthoonyera mirima caya atthu ale. ¹² Amitthenka yahorwaca ni yahaalaka atthu oottharuwela itaampi. ¹³ Yahoomola minepa coonanara ciinci, yahaattikitthela ni makhura aretta enci mpaka waavoniha.

Ukhwa wawe Yohani Mpatisa

Mt 14.1-12; Lk 9.7-9

¹⁴ Mwene Heroti aheewa cuulumaceriyaka ca Yesu, nanruma ncina nawe ni anawiira: Ula phi Yohani Mpatisa oonwelenle mwaatthu ookhwa, phimaana cinawithoonyera mwa ule ikuru coopanka cotikhineeha. ¹⁵ Akina yaanawiira: Phi Eliya. Akina yanalipihera: Ri nnapiyu toko anapiyu akina. ¹⁶ Heroti nanso, wowiwa itthu ila anahimya eeraka: Yohani unthikinlyaka isiko phunwelenle. ¹⁷ Khweeli, Heroti phalamunle utthukiya Yohani ni weesiya nkalaposo, nlattu wa Herotiyata, amwaarawe Filipe nhimaawe, anthenlyawe. ¹⁸ Nlattu Yohani anamwiirela Heroti: Khunleveliya ukhalana amwaarawe nhi-maa. ¹⁹ Herotiyata hopophela nreca ni anathhuna umwiiva, nanso khoorya, ²⁰ nlattu Heroti anamoova Yohani ni, acuwelaka wiira ari ntthu ooloka ni nttakattifu, anamwaakhiha; wamwiiwawe anasanka, nanso anam-miriyana ni uciveliya. ²¹ Nanso nahophiya nihuku nooreera, Heroti wopuwelenlyawe nihuku nayariyawe ahophavela yoolya yinci yowaavaha oolupale owahano, oolupale anakhotto, ni mamwene o Kalileya. ²² Nakenle wiina mwana nthiyana a Herotiyata wahoncivela Heroti na atthu yaalattuliye. Mwene ahomwiirela mwali: Ukilepele itthu phi itthu intthunaa ni mi kimmowuvaha. ²³ Ni ahopwahera: Kimmowuvaha itthu yothene in-halaa ukilepela hata ukhalaka mwanusu omwene aka. ²⁴ Mwali ahokhuma waakoha anumwane wiira: Kilepele isiyani? Ala yahaakhula: Muru wa Yohani Mpatisa.

²⁵ Mwali akelaka tho nenna nna, ahonlepela mwene, eeraka: Kintthuna uvahiya nananoru, unaheliye munttiisini muru wa Yohani Mpatisa. ²⁶ Mwene ahotuthuwa, nanso nlattu woolupela wawe ni, nlattu waatthu yaalatuliye, khathunne unthuwa. ²⁷ Nenna nna ahonlamulela mayorontta uwiha muru wa Yohani. Mayorontta ahorwaa nkalaposo ni ahothikila isiko ya Yohani, ²⁸ ni wahoolo ahowiha muru munttiisini mpaka ummaha mwali, ni ula ahaavaha anumwane. ²⁹ Ucuwela waya itthu ila owiitthuca a Yohani, yahokusa nrutthu ni yahothipela mmahiyeni.

Mikatthe cinawucereriya

Mt 14.13-21; Lk 9.10-17; Yohani 6.1-14

³⁰ Amitthenka yahothukumana wa Yesu ni yahont-tonkacera citthu cothene capankilyaya ni citthu cihilyaya. ³¹ Ni Yesu ahaahimerya: Mmweeke, nirwe nipuro nowiipithyaa ni mmumule vakani, nlattu yaari enci jaarwa ni yaawa mpaka uhikhalana ukati woolya. ³² Vano yahorwaa ni ikalawa nipuro nowiipithyaa na-haariwo hata ntthu. ³³ Yoonaka arwaka, enci yahocuwela ukitthu unkelaya. Ni mmatthokoni mothene yahorwaa, yeetaka vathi, nipuro nne, ni yahophiya nraci. ³⁴ Wakhuruwawe nkalawani, Yesu ahoona mphwinko muulupale ni ahoonela ikiriri, nlattu yaari toko ikhontwaa cohikhalana nhaakheli. Vano ahopacera weethuciha ukati mwinci. ³⁵ Ncuwa wakelaya utthekuwa, owiitthuca awe yahomwattamerya nuunhimerya: Nipuro nna niri toko mwini, ni ncuwa notthekuwa. ³⁶ Walamulele urwaa mmawaani ni mmatthokoni cowattamana wiira yathume yoolya. ³⁷ Ahaakhula: Mwaavahe nyenyu wa yoolya. Na ale yahonhimerya: Wothuma mikatthe cowavaha atthu ale othene, nimphavela ncurukhu iminya piili. ³⁸ Yesu ahopwahera: Nhaana mikatthe mikavi? Nrwee moone.

Anakohile atthu, yahaakhula: Mikatthe mithanu ni ihopa piili. ³⁹ Ahaalamulela wonkomiha atthu vakani khila nipuro mmalasini makithi. ⁴⁰ Ni yaanawunkoma khila ipuwa atthu iminya ni ipuwa ikhwawe atthu hansini. ⁴¹ Vano ahokusa mikatthe mithanu ni ihopa piili ni, aweehaka wirimu, ahosukurela. Ahomyaniha mikatthe ni ahaavaha owiitthuca awe wiira yakawele atthu. Ni ahaakawela ihopa piili, ⁴² na atthu ale yaholya mpaka uvona. ⁴³ Ni ahocariha tho itthuttu khumi na piili ikalathela cahanle co mikatthe ni co ihopa. ⁴⁴ Vano yalilyayo mikatthe nye yaari atthu elufu thanu.

Yesu naweetta waculu maasi

Mt 14.22-33; Yohani 6.16-21

⁴⁵ Nananoru ahaakhanyereriha owiitthuca awe ukela nkalawani nuulapuwela nikhopela nikhwawe no Pet-sayita; mwaneene alaseraka mphwinko. ⁴⁶ Analasenre mphwinko ule, ahowela umwakoni, uswali. ⁴⁷ Wiila waya, ikalawa yari iriyari ntthiya, ni Yesu aheemela nceresere veekhawe. ⁴⁸ Wona wawe wiira yahoooya weettiha ikalawa nlattu iphyoo yanavirikana, aheekamela weeraka mapikoosa, eettaka wamaasini mpaka utthuna uhapuwa. ⁴⁹ Nanso owiitthuca yamoonaka weetta wamaasini yahopuwela wiira nnepa, ni yahokhuwa. ⁵⁰ Othene mweeco yahomoona ni yahotuthuwa. Mwaneene nanso aholumacera, eeraka: Mpise nrima, phi mi, nhoove! ⁵¹ Wahoolo, ahokela nkalawani mwariyaya, ni iphyoo yahowukuwa. Othene yanawoova venci. ⁵² Khayeewehile ni nlelo itthu yeranele ni mikatthe nye nlattu woolipa mirima caya.

Yesu nawavoniha aretta uYenesare

Mt 14.34-36

⁵³ Analapuwenle ukhopela, ahophiya ilapo yo Yenesare ni ahovonyera vathi nankura. ⁵⁴ Anakhumile nkalawani, atthu uwonwo yahoncuwela. ⁵⁵ Yahophiya

atthu enci olapo ile ni yahopacera wawiha aretta mmarepani ni aharweha nipuro nacuwenlyaya wiira phiryawe. ⁵⁶ Mmatthokoni makani, itthoko cuulupale ni mmawaani, nipuro phi nipuro nakelawe yanaweesiya aretta mparaparani ni yahoonlepela wiira aleve mena ukwanyiya nlempe no nhancu awe. Na atthu othene yankwanya yanavona.

7

*Coohiyerana co Mahumu**Mt 15.1-20*

¹ Mayowantikha ni mafarisi akina, akhumaka o Yerusalemu, yahothukumana ntotho wawe Yesu. ² Yahoona wiira owiitthuca awe akina yanalya nkatthe ni matata oohirya, manaaya woohinyawa. ³ Mafarisi ni Ayutta othene khanlya woohinyawa ratta ratta, toko calemalenlyaya atthu ookhalayi. ⁴ Waturuwaya uparasa, khayalya ihinaya unyawa; ni cihaawo tho citthu cinci cikina cimpankaya attharaka citthu cookhalayi, toko urapiha ikahi, myaapu, ni myaapu co ncukhuma ni mikori. ⁵ Yahonkoha vano, mafarisi ni mayowantikha: Owiitthuca aa ahiwelelaka citthu cookhalayi, alyaka ahinyawile, isiyani? ⁶ Yesu ahaakhula: Hohimya ratta nnapiyu Isayiya, awacakani nyu, atthu o mirima miili, toko cantikhiyaya:
Mphwinko ula unakittitthimiha ni mattere,
nanso nrima aya unkhala uttayi waka.

⁷ Anakilapela vathiru,

ni yeetthucihaka malamulo a atthu paahi.*

⁸ Ahiyaka nlamulo na Nluku, phuttharaka coohiyerana ca atthu, toko urapiha myaapu ni ikahi ni citthu cinci col-ikana nnya. ⁹ Ni aheerela: Nnahiya nteeliyaka nlamulo

* 7:7 Isaya 29.13

na Nluku wiira nthareke coohiyerana cinyu. ¹⁰ Musa, mweeco, heera:

Wattittimihe athumwanaa na anumwanaa;*

ni

Ntthu nohala walapha athumwane na anumwane at-tarusiye ni eeviye.*

¹¹ Nyu nanso nneera: Ntthu nohala wahimerya athumwane atthuna anumwane: Itthu yahalaka wuvahani nyuva phi ila 'korpan' manaaya, itthu yoovahiya Apwiya. ¹² Ciicammo khanonhiyera ntthu itthu yowapankela athumwane atthuna anumwane, ¹³ mmalihaka ciicammo nuulumo na Nluku nlattu wo coohiyerana cookhalayi cinvahenyu. Ni napanka citthu cinci toko nnya.

Cinapankiha atthu ukhala aharamu

¹⁴ Eehanaka tho mphwinko, Yesu anawahimerya: Nkiviriyane othene, ni mwavye wiiweha. ¹⁵ Khiiwo iri utaa wawe ntthu, ineera inakenle nhina mwawe, phoorya untatusa iharamu; nanso inkhuma muntthuni, ila phinoorya untatusa iharamu. ¹⁶ Ntthu urina manyaru uwiiwelela, eewe! ¹⁷ Wakenlyawe mpaani, nahile mph-winko, owiitthuca awe yahonkoha manaaya nlikanihero nna. ¹⁸ Ahaakhula: Nyu ciicammo khaneeweha? Khan-nocuwela wiira, citthu cothene co utaa cinkela munt-thuni, khacinoorya untatusa iharamu, ¹⁹ nlattu khinkela munrimani, nanso nnapwiipwini mwawe, ni wahoolo inakhumela wanipuroni waya? Ciicale anahimya wi-ira coolya cothene cooreera. ²⁰ Ni ahohimya tho: It-thu inkhuma muntthuni, yeeyo phinontatusa iharamu. ²¹ Nlattu nhina nrima wantthu phinkhumaya moopuwelo oonanara: ulavalava, wiinya, wiiva, ²² uraruwa, isoyo,

* ^{7:10} Ukhuma 20.12; Dt 5.16

* ^{7:10} Ukhuma 21.17; Lv 20.9

wunlela coonanara, uthepya, uhilemeliha irutthu, urama, ukufuru, wiicona, uhiwacera itthu yomaana. ²³ Citthu nnye cothene coonanara cinkhuma nhina, ni cinantatusa ntthu nharamu.

Nthiyana Nkananeya

Mt 15.21-28

²⁴ Akhoolaka nipuro nne, ahorwaa nttette wo Tiro ni wo Sittoniya. Ahokela mpani ni khatthuna wiira acuweliye ni ntthu, nanso khoonrye wiipitha. ²⁵ Vano wohipica nthiyana arina mwanawe mwanthiyana avariye ni nnepa woonanara weewilyawe wuulumaciya ca Yesu, ahowa unkhromela wamettoni wawe. ²⁶ Ari nthiyana nsenci, olapo yo Siriya-Fenisiya, ni ananlepela wiira oomole ncini wa mwanawe. ²⁷ Ahaakhula: Wareerihe, toko, avone oopacera asaana; wona khavanreera ukusa nkatthe wa asaana ni warihela asilapwa! ²⁸ Ale mweeco, yahomwakhula: Khweeli, Pwiya, nanso hata asilapwa analya vathivaya meeca coolya ca asaana cimmora-mora. ²⁹ Yesu ahomwiirela: Nlattu wo nuulumo nna, urweke, ncini nookhuma mwa mwanaa. ³⁰ Ahoturuwela uwaani ni ahomphwanya mwamhima nonkomile wakorini. Ncini nahonhiya.

Ntthu oohiwa ni oohuulumaca navonihya

³¹ Nakhumile tho nttette wo Tiro, ahowela o Sittoniya, mpaka ntthiya no Kalileya, aphulanihaka nttette wo Kapole. ³² Yahomwiihera ntthu oohiwa, ni wanrikarikela wuulumaca, ni yahonlepela wiira anthatele ntata. ³³ Yesu antamihaka waatthuni ahonhela makokho manyaruni ahonsuwela ni ukwanya nlimi ni isene. ³⁴ Ni awusaka miitho wirimu ahohihimerya, eeraka: 'Effatha' man-aaya 'wiihule.' ³⁵ Manyaru yahonhulya namarweele, nlimi nawe nahontthukuwa ni ahopacera wuuluma ratta. ³⁶ Yesu aheera wiira hinhimerye ntthu itthu yeraneele,

nanso waatepawe waateliha, phaatepaya umwarusela. ³⁷ Atikhinacaka, yaanawiira: Cothene nopanka cotikhi-neehe, heewiha atthu uhiwa, ni wuulumaciha atthu oohu-ulumaca.

8

Mikatthe cinawincereriya imaara yonapiili

Mt 15.32-39

¹ Mahuku ale, ukhala wiira wahotthukumana tho mphwinko muulupale na atthu khayarina yoolya, Yesu aheehana owiitthuca awe ni ahaahimerya: ² Ukiiriha ihaaya mphwinko ula. Nna va ahovira mahuku mararu anari ni mi ni kharina yoolya. ³ Kaalaseraka ciicale woohilyetthu, wiira arwe mmwanyaya anaahala ukhwa mahile ni iphiro, kontha akina akhumile uttayi. ⁴ Owiitthuca awe yahomwaakhula: Nohala woorya cani ntthu waaliha nkatthe, watakhwani va? ⁵ Nanso ahaakoha: Nrina mikatthe mikavi? Yahaakhula: Mithanu na miili. ⁶ Aholamula wiira atthu yunkome vathi. Ni, akusaka mikatthe mithanu na miili, ahoreeriha, ahomyaniha ni ahaavaha owiitthuca awe, wiira yakawele na ale ya-haakawela atthu. ⁷ Yahaana tho asihopa vakani. Ahoreeriha ni aholamula wiira yaakawele. ⁸ Yaholya mpaka urupala, ni ikalakathela cahanle nyo owiitthuca awe yahot-tottela itthuttu thanu na piili. ⁹ Atthu ale yaari elufu cese (4000). Wahoolo ahaalaseru. ¹⁰ Ni awelaka vano nkalawani ni owiitthuca awe, ahorwaa mittetthe co Talmanuta.

Mafarisi analepela ikanyero

Mt 16.1-4

¹¹ Yahowa mafarisi yapacenre unyakulihana ni Yesu ni woontteha yahoonlepela ikanyero yo wirimu. ¹² Yesu ahihimeryaka ni nrima wothene, aheera: Nlattuni weesiyani nihimo nna ninalepelela ikanyero? Khweeli kinawuhimeryani wiira nihimo nna khaninhala uvahiya

ikanyero hata vakani. ¹³ Ni aahiyaka, ahokela nkalawani, mpaka ulapuwela ikhopela ikina.

Miropo co mafarisi ni ca Heroti

Mt 16.5-12

¹⁴ Owiitthuca yaholiyala uwya mikatthe, ni nkalawani khayaarina tho waari nkatthe mmoca paahi. ¹⁵ Yesu aheerela: Moone, nkhale miitho mmwehaka ratta miropo co mafarisi ni miropo ca Heroti. ¹⁶ Na ale yahopacera uvanyihana, yopuwelaka wiira waaciye uhikhalana nkatthe. ¹⁷ Yesu nanso, weewilyawe moolumo ale, ahaahimerya: Nlattu isiyani moopelaka mwaha o itthu yohikhalana nkatthe? Nanlelo khannahelera ni khanneeweha? Nri ni nrima woturumala. ¹⁸ Nhaana miitho ni khannoona? Nhana manyaru nanso kanneewa ni khannopuwela.* ¹⁹ Itthuttu kavi cocara ni coohala caattottenlenyu, wamyanihilyaka mikatthe mithanu kaakawelaka atthu elufu thanu? Yahaakhula: Khumi na piili. ²⁰ Ni wamyanihilyaka mikatthe saapa pwaavahaka atthu elufu cese, mwacarihile itthuttu kavi cokalakathela co mikatthe? Yahaakhula: Saapa. ²¹ Ni anaweerela: Nanlelo khanneewa?

Ntthu oohoona navonihiya

²² Yesu ni owiitthuca awe yahophiya o Petsayita ni yahomwiihera ntthu oohoona, anlepelaka wiira ankwanye. ²³ Ahommarela ntata ntthu oohoona ni ahonrweha ncere-sere itthoko, ahonhela isenye mmithoni mwawe, ahonthatela matata nuunkoha: Unawoonaka itthu? ²⁴ Ule ahoteesa miitho ni aheerela: Kinawoonaka atthu, yeetaka ankhala toko miri. ²⁵ Ahonthatela tho matata mmiithoni, ni ule ahopacera woona uparapara, ni ahovona, oonaka rattaratta uttayi ni uparapara citthu cothene.

* 8:18 Isaya 6.9-10

²⁶ Yesu vano ahonlamulela urwaa uwaani, ni ahomwiirela: Uhikele mena umawaani.

Peturu nanrumelela Yesu Mwana a Nluku

Mt 16.13-20; Lk 9.18-21

²⁷ Yesu ahoonwa na owiitthuca awe, akelaka umawaani co Sesareya wo Filipe. Mphironi ahaakoha owiitthuca awe, eeraka: Atthu ayo aneera wiira Mi kipani?

²⁸ Yahomwiirela: Yohani Mpatisa, akina Eliya, ni akina tho aneera wiira uri mmoca mwa anapiyu. ²⁹ Ni ahaakoha: Ni nyu nneera Mi kipani? Peturu ahaakhula: We uri Kristu.*

³⁰ Ahaalamulela vano, wiira ahinhimerye ntthu itthu ila.

Yesu nahimya imaara yoopacera wiira naahala uhuvihya ni wiiviya

Mt 16.21-23; Lk 9.22

³¹ Wahoolo ahopacera weetthuciha wiira Mwanawe Pinattamu naahala uhuva venci ni ukhottiya ni mahumu, ni oolupale a mayasataka, ni mayowantikha, mpaka wiiviya ni wunwelela anavinre mahuku mararu; ³² ni anawahimerya itthu ila wohakhuwa-khuwa. Peturu ahomwiihana Yesu ni ahopacera unkuphula. ³³ Yesu nanso arukunuwaka, ni awehaka owiitthuca ahonkuphula Peturu, eeraka: Uthame wiitho aka, Sotwani, kontha khummwacera citthu ca Nluku, nanso paahi citthu ca atthu.

³⁴ Eehanaka mphwinko wa atthu wamoca ni owiitthuca awe, aheerela: Ntthu, atthunaka ukitthara, eerune mwaneene, akuse nsalapa awe ni akitthare.* ³⁵ Nlattu, ntthu nohala uphavela woopola ukumi* awe unanrihya, ni unhala unrihya nlatu wo miyano, ni nlatu wo Nhupi Wooreera nowowopola. ³⁶ Enhala ukhuma isiyani, ntthu uphwanya ittuniya yothene ni arihaka nnepa awe?

* 8:29 Yohani 6.68-69 * 8:34 Mt 10.38; Lk 14.27 * 8:35 Mt 10.39; Lk 17.33; Yohani 12.25

³⁷ Atthuna ntthu nohala uvaha isiyani wo wakakhaniha nnepa awe? ³⁸ Ntthu mweeco nohala wuliya muru nlatu wo Miyano ni nlatu wo moolumo aka wamiithoni wanloko nna nookosakosa nimwalaanne ni Mi, ciicammo, Mwanawe Pinattamu naahala wuliya muru nlatu wa ale aphyaka o nnemani wa Athumwane wamoca ni Ancelo attakattifu.

9

¹ Yesu ahaahimerya tho: Khweeli kinawuhimeryani wiira akina mwaala ari vava kxanhala ukhwa ahinaya woona omwene wa Nluku uwaka ni ikuru caya.

Wiitatusa wa Yesu

Mt 17.1-8; Lk 9.28-36

² Anavinre mahuku siita, Yesu ahaakusa Peturu, Yakopu ni Yohani, ni ahaaweliha veekhaya, mwaako woorekama. Ni aheetatusa wamiithoni waya. ³ Coowara cawe cahothatuwa coowarya, cootteela usilili toko khaawo mayokattha vathiva uwoorya utteeliha ciicale.

⁴ Ahaakhumelela Eliya wamoca ni Musa ni ooyeli yanawuulumaca ni Yesu. ⁵ Peturu ahomwiirela Yesu: Mwalimu oreera ukhala vava, niteke marapattha mararu, nimoca na waa, nikina na Musa nikhwawe na Eliya. ⁶ Kontha khayaacuwela itthu yaahimiyawe nlatu yanawoova venci. ⁷ Ni nahokhuruwa nihutte nakhunenle ni ntthuuci, ni nahokhuma ncu nihutteni neera: Ula mwanaka oofentiya. Yooyo mwiiwe. ⁸ Nenna nna, awehaka, khayamoonne tho ntthu, ari Yesu veekhawe.

⁹ Wakhuruwaya mmwakoni, Yesu ahaalamulela wiira ahihimerye ntthu itthu yoonyaya, mpaka wahooo Mwanawe Pinattamu nonwelenle mwaatthu ookhwa. ¹⁰ Ale yahotthara moolumo ale, nanso yaanakohana ayayoru manaaya, 'wunwelela mwaatthu ookhwa.' ¹¹ Ni yahonkoha yiiraka: Mayowantikha aneerelani wiira

woopacera Eliya phinhala uwa? ¹² Ahaakhula: Aye, Eliya, awaaka woopacera naahala weesa wanipuroni waya citthu cothene, nanso yantikhiye isiyani ya Mwanawe Pinattamu, wiira nalamuliya uhuva venci, nuunyoholiya. ¹³ Ni mi mweeco kinawuhimeryani: Eliya ahowa, ni yahompankela cothene catthunaya, toko caantikhiye.*

Yesu ahonvoniha ntthu oowerenya icilicili

Mt 17.14-21; Lk 9.37-43

¹⁴ Naphile waryaya owiitthuca awe ahoona mphwinko muulupale wa atthu warukurenrye ayoca, ni mayowantikha anyakulihanaka na ale. ¹⁵ Amoonakaru Yesu yahotikhina ni yahotthimakaca unkoha isalama. ¹⁶ Ni ule ahaakoha ale: Nnonyakulihanani? ¹⁷ Ntthu mmoca mwa mphwinko ule, ahomwiirela: Mwalimu, kihowiihera mwanaka, rina nnepa woohuumumaca. ¹⁸ Wammaraka vale, unamphatela vathi ni ule napacera ukhuma niphooru, ucekesa miino ni phuumaka teyeye. Kihaaelepela owiitthuca aa wiira yoomole ncini, nanso khayoonrye. ¹⁹ Yesu aheerela: Nyu, nloko noohikupali, kinhala ukhala ni nyu mpaka yakhani? Kinhala wuvilelani mpaka yakhani? Nkiwiihere woono. ²⁰ Yahommwiihera. Nimoonaakaru Yesu, ncini nahompukunyaa mwanhima ni ikuru, mpaka umphatela vathi, ni ahopacera uphirikyaa akhumaka niphooru mwano. ²¹ Yesu ahaakoha athumwane: Itthu ile inomwiiryanyaa ikhumelo yakhani. Na ale yahaakhula: Ikhumelo mwanamwane, ²² ni imaara cinci nahommonyera wamooroni ni mmasini wiira amwiive, nanso wooryaka vale upanka itthu, unoonele ikiriri, nuunikhavihere. ²³ Yesu ahomwiirela: Wooryaka! Ntthu nokupali citthu cothene cinawooryanyaa. ²⁴ Nenna nna, athumwane mwana oyo yahokhuwa: Kinakupali;

* 9:13 Malakiya 4.5

nkikavihere uhikupali waka! ²⁵ Yesu, oonaka wiira atthu enci yanawa, aholamulela nnepa woonanara ni aheerela: Nnepa wohuulumaca ni wohiwa, Mi kinawulamulela, ukhume wamwana ola, nuuhinturuwele tho. ²⁶ Ni nnepa, ukhuwaka ni wicipulacaka ni ikuru, wahokhuma. Mwanhima ahokhala toko ookhwa, mpaka atthu enci wiira hokhwa. ²⁷ Nanso, ammaraka ntata, Yesu ahommusa, ni ule aheemela.

²⁸ Ukelawawe mpani, owiitthuca yahonkoka veekhawe: Nlattuni hiyano khaanoonrye woomola? ²⁹ Ahaakhula: Nloko nna ninoomoliya ni iswali ni utthuka paahi.

Yesu nahimya imaara yonapili uhuva ni ukhwa wawe

Mt 17.22-23; Lk 9.43b-45

³⁰ Akhumaka wonwo yahottupulaniha ilapo yo Kalileya, ni Yesu khatthuna wiira acuweliye ni ntthu, ³¹ nlatu anavira eetthucihaka owiitthuca awe ni anaweerela: Mwanawe Pinattamu naahala urwehiya mmatatani mwaatthu anhala umwiiva, nanso, nakhwile nowowunwelela anavinre mahuku mararu. ³² Nanso ayo khayeeewehile nuulumo nne, ni yanamoova unkoha.

Tipani nohala ukhala muulupale cinene?

Lk 9.49-50

³³ Yahophiya uKafarnaum, ni, anari uwaani, Yesu ahaakoha: Mwavanyihanani mphironi? ³⁴ Yahomaalaca, nlatu mphironi yanavanyihana ayayoru, wiira tipani ri muulupale mwaale. ³⁵ Unkomaka, Yesu aheehana owiitthuca awe khumi na eeli ni ahaahimerya: Ntthu aphavelaka ukhala muulupale, eepanke mwankani mwaatthu, ni akhale nrumeyi a atthu othene. ³⁶ Ni ankusaka mwanamwane, ahomweesa iriyari aya, ahommarela ni aheerela: ³⁷ Ntthu nomwaakhela mwanamwane toko ula mwancina naka, nokaakhela Miyano, ni ntthu nokaakhela Mi, khankaakhela Mi, nanso Ule kirumile.

Ntthu hinoniina, nawiraana ni hi.

Lk 9.49-50

³⁸ Yohani ahonhimerya: Mwalimu, nihomoona ntthu oomolaka macini mwancina naa, ni ntthu ule khanditthara, ni nihomwaateliha. ³⁹ Yesu ahaahimerya: Nhimwaatelihe, nlatu khaawo nopanka cotikhineeha mwancina naka phukaapa mi nenna nna. ⁴⁰ Ntthu hinoniina, nawiraana ni hi. ⁴¹ Ntthu novahani ikoopu yo maasi wiira mmurye nlatu wokhala owiitthuca awe Kristu, khweeli, kinawuhimeryani, khankela ahalelaka itthuvo awe mena vakani.

Cookosiha

Mt 18.6-9; Lk 17.1-2

⁴² Ntthu nohala unkosiha mmoca mwaasinamwane ala ankikupali Mi, fatari atthukeleliye nsiko mmo nsilo noosileliya ni avonyeriye mpaharini. ⁴³ Ntata naa nookosihaka, uthikile. Unareera ukela wokumini ni ntata noopahuwa, wahohiyana ukhalana matata oomeli ni urwaa umooroni oohinttiphyaa. ⁴⁴ Wonwo uhinkhwa asunku, ni mooro khunttiphyaa.* ⁴⁵ Nnya naa nookosihaka, uthikile. Unareera ukela wokumini unapahuwile, wahohiyana ukhalana oomeli uvonyeriyaka umooroni. ⁴⁶ Wonwo uhinkhwa asunku, ni mooro khunttiphyaa. ⁴⁷ Ni niitho naa nookosihaka, uphele. Unareera ukela umweneni wa Nluku ni niitho nimoca, wahohiyana ukhalana oomeli uvonyeriyaka umooroni. ⁴⁸ Wonwo uhinkhwa asunku, ni mooro khunttiphyaa. ⁴⁹ Phimaana khula ntthu naahala ulukiya ni mooro. ⁵⁰ Maakha phi itthu yooreera; nanso yathatuwaka ooririya, ammolukiya ni isiyani? Nkhalaneke maakha mwanyu ni mweetteke ni mpuha ntthu ni nkhwawe.

* 9:44 Isaya 66.24

10

*Uthelana khumwalaaniya**Mt 19.1-12; Lk 16.18*

¹ Nakhumile wonwo, ahokela nttette wo Yutteya ni ukhopela mooloko Yorttani, ni mphwinko unathukumanne tho nipuro naryawe, anaweeethuciha tho, toko calemalenyawe.

² Yahomwattamerya mafarisi ni yahonkoha anttehaka: Iri yooreera nlopwana wamwalaana amwaarawe? ³ Ahaakhula: Musa holamulenleni isiyani?

⁴ Yahomwaakhula: Musa holevela waavaha iwarakha yoomwalaana, ni waahiya. ⁵ Yesu ahaakhula tho:

Nlattu woolipa winyu nrima phuvahilyaweni nlamulo nno. ⁶ Nanso, wupattusoni wolapo, Nluku ahompanka nlopwana ni nthiyana. ⁷ Phimaana, nlopwana naahala waahiya athumwane na anumwane ni nokookhala na amwaarawe. ⁸ Ni ooyeli ankookhala irutthu imoca.

Phimaana, khankhala tho eeli, nanso irutthu imoca.* ⁹ Vano, yooluttanihiya ni Nluku, khimwalaanihiya ni ntthu.

¹⁰ Anaphile uwaani, owiitthuca awe yahonkoha tho itthu ile. ¹¹ Yesu ahaahimerya: Ntthu nohala wamwalaana amwaarawe ni waathela akina, neetta uluva ni nthiyana ule, ¹² ni nthiyana ammwalaanaka mannawe nuutheliya ni nkina, neetta uluva.

*Yesu nawareeriha amirawo**Mt 19.13-15; Lk 18.15-17*

¹³ Yahomwiihera asinamwane wiira aakwanye, nanso owiitthuca yahakuphula ale yawihile asaana. ¹⁴ Yesu, oonaka itthu ile ahonyonyiya ni aheerela: Mwalevele, amirawo akiweele, ni nhoomole, nlattu omwene wa Nluku uri wa waya. ¹⁵ Khweeli kinawuhimeryani, ntthu hinhala

* 10:8 Mpattuwelo 2.24

waakhela omwene wa Nluku toko mmirawo, kxanhala ukela wonwo. ¹⁶ Wahoolo ahaakusa vayawani phwathate-laka matata ni ahaareeriha.

Oothaciri wowoopiha

Mt 19.16-22; Lk 18.18-23

¹⁷ Wakhumilyawe eettaka ni iphiro, ahomwattamerya ntthu atthimakacaka, ni akhoromelaka ahonkoha: Mwalimu ooreera, kipankekeni wiira kiphwanye ukumi woohimala? ¹⁸ Yesu ahonhimerya: Nnokihanelani ooreera? Khaawo ooreera hikhanle Nluku paahi. ¹⁹ Unacuwela malamulo: Uhiive, uheette uluva, uhiinye, uhootho, uhithepye, waalemelihe athumwanaa na anumwanaa.*

²⁰ Ahomwaakhula: Mwalimu, cothene nnya kihosunka ikhumelo mmirawo. ²¹ Yesu amwehecesaka, ahomfenta, ni ahomwaakhula: Inawuhaleela itthu imoca paahi; Urwee, watumihe citthu cothene cirinaa, waavahe nsurukhu uyo atthu oothwenya, ni ommokhalana nhakhu wirimu; uwe ni ukitthare. ²² Nanso, weewilyawe moolumo ale, ahothulana ni ahothama ni icuku, nlatu arina mihakhu cinci.

²³ Awehaka nceresere, Yesu aheerela owiitthuca awe: Urikarika venci, atthu oothaciri ukela wumweneni wa Nluku. ²⁴ Owiitthuca wahooma uwanoni, wowiwa moolumo ala. Nanso Yesu ahopwahera: Asaana aka, cirikarikilyaya ukela wumweneni wa Nluku, ale ankhulvela mihakhu. ²⁵ Khavarikile uvira nkamira mwiithe wo sinkano, uhohiyana ukela thaciri wumweneni wa Nluku. ²⁶ Ale yahotikhina wootepa nanlelo ni yanawiiirelana ayayoru: Vano, tupani nohala woopwa!

²⁷ Awehecesaka, Yesu ahaakhula: Na atthu khinooryaniya, nanso ni Nluku citthu cothene cinawooryaniya. ²⁸ Peturu ahopacera unhimerya: Hi nihohiya cothene nihottharani. ²⁹ Yesu ahaakhula: Khweeli kinawuhimeryani

* 10:19 Ukhuma 20.12-16; Dt 5.16-20

wiira khaawo ntthu nohala uhiya inupa awe, asunnawe, asirokorawe, athumwane na anumwane, asaana atthuna imatta awe nlattu wo Miyano, ni nlattu wo Nhupi Wooreera, ³⁰ phihaakhela mpaka imaara iminya, nanano ukati ula urihula, inupa, asunnawe, asirokorawe, anumwane, asaana ni imatta, wamoca ni womolanihaciya, ni wahoolo ukumi woohimala. ³¹ Enci oopacera ankokhala uwiheerya, ni uwiheerya ankokhala oopacera.

*Yesu nahimya imaara yoneeraru coohuva ni ukhwa wawe
Mt 20.17-19; Lk 18.31-34*

³² Owitthuca yaanaweetta ni iphiro, awelaka uYerusalemu, ni Yesu anaweetta uhoolo waya. Yanatikhina ni yaanantthara ni woova. Ahaakusa tho owitthuca khumi na eeli, ahopacera wahimerya itthu yahala umwiiranela, ³³ eeraka: Mwiiwe, ninawela oYerusalemu, ni Mwanawe Pinattamu naahala urwehiya mmatatani moolupale a mayasataka ni mayowantikha, na ale anaahala ummaanala umwiiva nuunrweha waasenci. ³⁴ Anaahala untarawa, unsuwela wiitho, umwapsyulaca nuumwiiva, nanso nihuku noneeraru naahala wunwelela.

*Ulepela wa asaana a Sepetteu.
Mt 20.20-28*

³⁵ Yakopu ni Yohani, asaana a Sepetteu, yahomwatamerya ni yahomwiirela: Mwalimu, nimphavela, unipankele yothene inhalehu wulepela. ³⁶ Yesu ahaakoha: Nnophavela kuupankeleni isiyani? ³⁷ Yahomwaakhula: Wumweneni waa, nunkome, mmoca mono nlopwana, ni nkina mono nthiyana. ³⁸ Yesu ahaakhula: Khannocuwela itthu inlepelelyu. Nnawoorya uwurya ikoopu inihalaka uwurya, ni waakhela upatiso unihalaka waakhela? ³⁹ Yahomwaakhula: Aye, ninawoorya. Yesu ahaahimerya: Nnowowurya ikoopu inihalaka uwurya, ni nnowopatisiya ni upatiso unihalaka upatiseriya, ⁴⁰ nanso, wunkoma

mono nlopwana atthuna nthiyana kahi phi Mi kinvaha, anovahiya ale asunkeriyeye. ⁴¹ Akina khumi, yiiwakaru itthu ile, yahonyonyiya ni Yakopu ni Yohani. ⁴² Yesu aheehana ni aheerela: Nhocuwela cimpanya alamuli onlaponi wiira acuwanehe iyulupale aya mmalokoni ni mahumu aya. ⁴³ Nanso ni nyuva khunhala ukhala commo. Ntthu nophavela ukhala muulupale mwa nyu eepanke nrumeyi, ⁴⁴ ni nophavela ukhala oopacera mwa nyu eepanke ipottha ya atthu othene, ⁴⁵ nlatu Mwanawe Pinattamu khaawile uvareliya nteko, nanso uvara nteko ni uvaha ukumi awe wiira oopole atthu enci.

Oohoona o Yeriko

Mt 20.29-34; Lk 18.35-43

⁴⁶ Yahophiya uYeriko. Wakhumaya uYeriko ni owi-itthuca awe, ni mphwinko muulupale, Partimeu, may-oolepela oohoona, mwanawe Timeu, ahonkoma ncere-sere iphiro aphaavelaka ulola. ⁴⁷ Weewilyawe wiira Yesu o Nasaree anavira, ahokhuwa: Yesu, Mwanawe Taviti, ukoonele ikiriri. ⁴⁸ Atthu enci yanankuphula wiira am-maalihe, nanso anapwaha ukhuwa khula imaara wootepa eeraka: Mwana a Taviti, ukoonele ikiriri. ⁴⁹ Yesu aheemela ni aheera: Mmwiihane. Yahomwiihana ntthu uhoona yiraka: Ulupe nrima, wunwe, nawiihana. ⁵⁰ Ni ule, arulaka ikacako awe, ahotupha ni ahorwaa waYesu. ⁵¹ Yesu ahonkoha: Untthuna kupankele isiyani? Oohoona ahaakhula: Mwalimu, koone. ⁵² Yesu ahonhimerya: Ur-wee, ikupalelo aa ihowoopola. Ni nananoru ahoona ni ahontthara Yesu mphironi.

11

Yesu nakela atthapeliyaka uYerusalemu.

Mt 21.1-17; Lk 19.28-40; Yohani 12.12-19

¹ Naattamenrye uYerusalemu, vakhiviru ni Petifaki ni Petaniya, coco ni mwako Olivera, Yesu ahaaruma owitthuca awe eeli, ² ni ahaahimerya: Nrwee iwaani yowaattamana, mwakelaka nnamphwanya mwaapuru ootthukiya, hinaya uweliya ni ntthu. Mwantthukule ni nkiwiihere. ³ Akhalaka ntthu nookohani, nlat-tuni mpankaka ciicammo. Mwaakhule Apwiya anam-phavela, ni ankowuturuselani wowakuvyaca. ⁴ Yahorwaa phumphwanyaka mwaapuru natthukeleliye wankhorani, mphante wovate woluwani, ni yahontthukula. ⁵ Ni atthu yaari wonwo yahokoha: Nnopankani muntthukula mwaapuru? ⁶ Yahaakhula toko Yesu cahimenrawe, ni yahaahiya urwaca. ⁷ Yahonrwehela Yesu mwaapuru uyo, yahonkhunela cowara caya, ni Yesu ahomwela. ⁸ Atthu enci yaanawatala cowara caya mphironi, akina yamwarusela miritha cikithi caathikinlyaya mmattani. ⁹ Atthu yahoonle na ale yantthara yanakhuwa: Hosaana, noreeriya nowa mwancina na Apwiya. ¹⁰ Uhoreeriya omwene umwa wa athumwanihu Taviti. Hosaana won-culu.* ¹¹ Ahophiya uYerusalemu, Yesu ahokela Inupa ya Nluku, ni namanle uweha citthu cothene canrukurenrye, wahokhala yocoocilo, ahokhuma, phurwaka uPetaniya ni owiitthuca awe khumi na eeli.

Mwiri wo nhokorokho oonalaphiya

Mt 21.18-22

¹² Wasilyaya wicisu wakhumaya uPetaniya, Yesu yahommola itala. ¹³ Oonaka uttayi mwiri wonhokorokho waari ni matakuru aya makithi, ahorwaa uweha wakhala wiira uhaawo nhokorokho wowiima, nanso attameryaka, khaphwanyile, aphwanyile matakuru paahi, kontha khawari ukati wowiima mihokorokho. ¹⁴ Aheerela vano:

* 11:10 Macipo 118.25-26

Hikhale tho nohala ulya cowiima caa. Ni owiitthuca awe yaheewa itthu ile.

Mayothumiha anawomoliya.

Mt 21.12-17; Lk 19.45-48

¹⁵ Yahophiya uYerusalemu, ni akelaka Inupa ya Nluku ahopacera woomola mayothumiha, na ale yathuma wonwo, ahokakhela vathi meeca a atthu yaakakhaniha, ni ihice ca atthu yathuma ikhunnta. ¹⁶ Ni khaalevela wiira ikusiye itthu yakhuma Inupa ya Nluku. ¹⁷ Ni anaweeethu-ciha eeraka: Ihantikhiya:

Inupa aka inowowihaninya inupa yoswali uneethi wothene.*

Nanso nyu nhotatusa nikhuku na namwiinya.*

¹⁸ Oolupale a mayasataka ni mayowantikha yaheewa itthu ile, ni yaanaphavela mananna umwiiva, nanso yaanamoova, nlattu mphwinko wothene wanawuminya mwaano ni meetthuciho awe. ¹⁹ Wiila waya, yahorwaa utaa waya iparasa.

Mwiri wonhokorokho unawuma.

²⁰ Uvira waya, wicisu, yahoona mwiri wonhokorokho unoomile, ni mitithari caya cothene. ²¹ Ni Peturu oop-uwelaka, ahomwiirela Yesu: Wooneke mwalimu, mwiri wonhokorokho ulaphilyaa, uhooma. ²² Yesu aheerela: Munkupali Nluku. ²³ Khweeli kinawuhimeryani, ntthu eerelaka mwako ula: 'Wiiphele nipuro niryaa wivonyere upahari', ni ahaanyihereke munrimani mwawe nanso akupaliki wiira itthu ihimilyawe inaahala wiiranyaa; khweeli, inawiiiranyaa. ²⁴ Phimaana, kinawuhimeryani wiira citthu cothene cinhalenyu ulepela nswaliki, nkupaliki wiira nnawaakhela, ni nnapattha. ²⁵ Mwemelaka vale

* 11:17 Isaya 56.7

* 11:17 Yereimiya 7.11

wiira nswali, mwakhalanaka mwamweetthu ni nkhwiinyu, munleveleke wiira Athumwaninyu, ari wirimu, yu-uleveleleni cookosa cinyu. ²⁶ Nlattu, mwahaleveleleke akhwinyu, Athumwaninyu ari wirimu kxanhala ulevelela cookosa cinyu.

Ikuru awe Yesu yoolamula

Mt 21.23-27; Lk 20.1-8

²⁷ Yahoturuwela uYerusalemu, ni Yesu eettaka Mpani mwaNluku, oolupale a mayasataka, mayowantikha ni mahumu, yahomwaattamerya ²⁸ ni yagoonkoha: Umpanka cithu nnya ni nlamulo nawani? Ulamulenle tipani upanka cithu nnya? ²⁹ Yesu ahaakhula: Hata ni mi, kinawukohani itthu. Nkaakhule vano kinaahala wuhimeryani cineeraka woopanka cithu nnya ni nlamulo nawani. ³⁰ Upatisu wa Yohani waari wo wirimu, atthuna wa atthu? Nkaakhule. ³¹ Yahopacera ukohana ayayoru, yiiraka: Neeraka, wo wirimu, naahala wiira, 'Nthinkupalenleni mweeco?' ³² Neeraka, wa atthu, ninawoova mphwinko. Nlattu othene yanamoona Yohani toko nnapiyu. ³³ Umwiisoni yahomwaakhula: Khanincuwela. Ni Yesu aheerela: Hata ni Mi akinohimeryani ni nlamulo nawani kimpankaka cithu nnya.

12

Nlikanihero na mayolima imatta yo vinyu.

Mt 21.33-46; Lk 20.9-19

¹ Yesu ahopacera woolumacera ni malikanihero: Ahaawo ntthu aanle imatta yo vinyu, ahophela nkucu, ahothipa nlitti no waameliya ivinyu ni ahoteka ipwaro. Wahoolo ahaahiyera ananteko arwaka ikwaha awe yoottayi. ² Ukati woohephiya, ahonruma nrumeyi awe wiira aakhele nuusu no cowiima co mmattani. ³ Ale

nanso, yahommara, yahomwaatta nuunturusela uttuli wohiitthu. ⁴ Ni ahonruma nrumeysi nkina. Ni uyo tho yahompwesa muru ni yahontarawa venci. ⁵ Ahonruma nkina, ni ule yahomwiiva. Ahaaruma akina enci, na ale yahaatta ni akina weeva. ⁶ Nahalenle nlelo mwanawe oofentiya, umwisoni ahonruma ule, eeraka: Anaahala unlemeliha mwanaka. ⁷ Nanso, ananteko yaheerelana ayayoru: Ule phinkokhalana imatta ila! Nrwee, nimwiive, ni imatta inakhala yawihu. ⁸ Yahommara ni yahomwiiva, nuunrihela nceresere imatta. ⁹ Mwaneene imatta ile nohala upankani? Nahala uturuwa ni weeva ananteko ayo, ni wahoolo, naahala waavaha imatta ananteko akina. ¹⁰ Khansomile cowantikhiya cittakattifu?

Nluku nikhottiye ni mayoteka,

nihothatuwa nluku no wanlothoni nowokolela inupa.

¹¹ Itthu ila inkhuma wa Apwiya,

ni iri yoothamaliya wamiithoni wihu.*

¹² Yaanawavya ummara, nanso yanawoova mphwinko, nlattu yaheeweha ratta, wiira nlikanihero nne naaca yaayo. Yahonhiya ni yahorwaca.

Nsoko wa Sesari.

Mt 22.15-22; Lk 20.19-26

¹³ Wahoolo yahonrumihela mafarisi ni maherotiyano akina wiira ammara mmoolumoni. ¹⁴ Amwaattameryaka yahomwiirela: Mwalimu, nihocuwela wiira uri nlopwana eekhweeli, khaawo nonramelaa, nlattu khumweha makhalelo a nthu, nanso unawiiithuciha iphiro ya Nluku, toko cinkhalaya yeekhweeli. Unihimerye, iri itthu yooloka athhuna yoohiloka unvaha nsoko Sesari? Ninvahe athhuna nihinvahe? ¹⁵ Yesu acuwelaka wototha waya, ahaakhula: Nnokittehacerani? Nkiwiihere nikopiri,

* 12:11 Macipo 118.22-23

koone. ¹⁶ Yahomwiihera ni ahaakoha: Yawani ila yocaphariya, ni yowantikhiya ila? Yahaakhula: Ya Sesari. ¹⁷ Yesu aheerela: Mumvahe Sesari itthu ya Sesari, ni Nluku itthu ya Nluku. Ni yahotikhinaca venci.

Nlahanya wo wunwelela

Mt 22.23-33; Lk 20.27-40

¹⁸ Wahoolo yahowa masatuseu, ale aneera khuwo wunwelela wa atthu ookhwa, yahomwaattamerya, ni yahonkoha Yesu: ¹⁹ Mwalimu, Musa honantikhela wi-ira ntthu ankhwelaka munnawe, pwahiyaka amwaarawe woohikhalana asaana, nhimaawe nolamuliya unthela nthiyana oohinnya wiira ahiye ipyo ya munnawe.*

²⁰ Vano yahaawo asunna saapa, ni oopacera uyo ahonthela ni ahokhwa woohahiya asaana. ²¹ Oonayeeli ahonthela nthiyana ahinye, ni uyo ahokhwa woohahiya asaana, ni ooneeraru uyo waheerannyaa ciicammo, ²² ni othene saapa yahokhwa woohahiya asaana. Wiimaleloni waya nthiyana uyo ahokhwa. ²³ Vanhala wunweleliya, nthiyana nohala ukhala amwaara awani, nlattu asilopwana saapa ale yahonthela nthiyana ule? ²⁴ Yesu ahaakhula: Nyu nnawitheyaca nlattu woohicuwela cowantikhiya cit-takattifu hata ikuru ca Nluku. ²⁵ Phimaana wanhalaya wunwelela mwaatthu ookhwa, khuwo utheliya, mena khuwo uthelana, nanso ammokhala toko ancelo o wirimu. ²⁶ Nanso itthu inaciya mowunwelelani mwaatthu ookhwa, khansomile ikitapu ya Musa, itthu yeeranele ni nikukhu napharela woohivya, toko Nluku caamuulumacenryawe eeraka:

Mi kiri Nluku a Aprhamu, Nluku a Isaaki, ni Nluku a Yakopu?*

²⁷ Khankhala Nluku a atthu ookhwa, nanso Nluku a atthu akumi. Nyu khanreere weetta ni ututhi.

* 12:19 Dt 25.5

* 12:26 Ukhuma 3.6

Nlamulo nootepa wunuwa.

Mt 22.34-40; Lk 10.25-28

²⁸ Ahomwaattamerya mayowantikha eewile avanyihanaka, ni oonaka wiira Yesu aakhunle ratta, ahonkoha: Phinni nlamulo noopacera o malamuloni othene? ²⁹ Yesu ahaakhula: Noopacera phi nna: Wiiwe Israel, Apwiya Nluku ihu pha Mwaneene Nluku veekhaya.

³⁰ Wafente Mwaneene Nluku aa,
ni nrima aa wothene,
ni nnepa aa wothene,
na ankhili aa othene,
ni ikuru caa cothene.*

³¹ Nonayeeli phi nna:

Umfente nkhwaa toko we o mwaneene.*
Khaniwo nlamulo noopwaha ala. ³² Mayowantikha yahomwiirela: Ureera cinene, Mwalimu, khaawoothile eenryaa wiira Ule ri veekhawe ni khaawo tho nkina noompwaha Ule; ³³ nuumfenta ni nrima wothene, ni ankhili othene, ni nnepa wothene ni ikuru cothene, nuumfenta nkhwaa toko mwaneene, iri itthu yootepa woovikana isataka coopahiya ni covelelihiya cothene. ³⁴ Yesu, oonaka wiira ntthu ule ahaakhula ni nruku, ahomwiirela: Khuri uttayi ni omwene wa Nluku. Ni khariwo tho unkoha itthu.*

Mesiya ni Taviti.

Mt 22.41-46; Lk 20.41-44

³⁵ Eetthucihaka Mpani mwa Nluku, Yesu ahokoha: Mayowantikha ahimyaka cani wiira Mesiya phiri mwanawe Taviti? ³⁶ Taviti mwaneene, athoonyeriyaka ni Nnepa Nttakattifu, heera: Apwiya yaheerela Apwiya aka:

* 12:30 Dt 6.5-6 * 12:31 Lv 19.18 * 12:34 Lk 10.25-28

Wonkome moono aka nlopwana, mpaka
Mi keese eenani aa vathivaya manyaa aa.*

³⁷ Taviti mwaneene namwiihana, Apwiya. Nokhalaka cani mwanawe? Ni mphwinko muulupale wanamwiiwa ni utteeliya nrima.

Yesu nawaattikittha aalimu o malamulo

Mt 23.1-7,14; Lk 20.45-47

³⁸ Wowiitthuciha, Yesu anawiira: Nkhale miitho, mwisunke ni mayowantikha unacivela uthoonyera coowara coorekama nuukohiya isalama mmapuwani; ³⁹ wonkoma mapuro uhoolo nnsinakokani ni mapuro anliya isukuhuulu. ⁴⁰ Anawalyacera anankwele yoothereryaka ni iswali coottaliva. Ala anowowaakhela ihukhumu yootepa.

Yoovaha ya nankhwele oohuva.

Lk 21.1-4

⁴¹ Nonkomile nipuro naheliya coovelela yawehaka atthu yahela nsurukhu nkasani mwe. Mathaciri menci yanahela nsurukhu mwinci. ⁴² Ahowa nthiyana nankwele oothwenya, ahelaka makopiri meli ooyevaca, manaaya nikupatta nonecese. ⁴³ Eehanaka owiitthuca awe, Yesu ahaahimerya: Khweeli kinawuhimeryani wiira nthiyana ula nankhwele oothwenya hohela woopwaha atthu othene ahenle nkasani yo nhakhu. ⁴⁴ Nlattu, othene yahrenle yohalahala muthacirini mwaya, nanso nthiyana oothwenya ahenle yothene yarinawe, ni khahalanne itthu hata yankani.

13

Yesu nahimya utankuliya yo Inupa ya Nluku.

Mt 24.1-2; Lk 21.5-6

* 12:36 Macipo 110.1

¹ Wakhumaawe Mpani mwa Nluku owiitthuca mmoca ahonhimerya: Mwalimu, moone, maluku menci ale ni cootekiya nnya! ² Yesu ahaakhula: Unawoona cootekiya nnye cuulupale? Khaninkela naahalaka nluku nimoca waculu nluku nikhwaya, cothene cimmotankuliya.

Uhuva ni uttharatthariya

Mt 24.3-14; Lk 21.7-19

³ Ni nonkomile mmwako wo Olivera uhoolo waya Inupa ya Nluku, Peturu, Yakopu, Yohani ni Anteree, yahonkoha ntthikini: ⁴ Unihimerye wiira citthu nnye cinhala wiranyaa yaakhani, ni ikanyero inhala uthonyera wiira citthu nnye ciri vakhiviru. ⁵ Yesu ahopacera wahimerya: Mwisunke wiira hikhale ntthu noothepyani. ⁶ Kontha, anaahala uwa atthu enci mwancina naka yiraka 'Phi mi!' mpaka wathepya atthu enci. ⁷ Mwiiwaka cuulumacyaka cokhotto, ni myaha cokhotto, nhituthuwe. Citthu nnye cinalamuliya wiiranyaa nanso khunakhala mviso. ⁸ Nloko nimoca ninhala uvaraana ni nloko nikhwaya, omwene mmoca ni omwene nkhwaya. Ilapo inaahala uthukumela mapuro makina, ni immovola itala. Citthu nnye ciri mapacerero woona coowerya.

⁹ Nkhale miitho! Anaahala wurwehani upwaroni, nnaahala wapsyuliya nnsinakokani. Nnaahala weemesiya wa miithoni wa mayansatoro ni mamwene nlattu wo Miyano, wiira mmahe usaahiti wamiithoni waya. ¹⁰ Nanso woopacera Nhupi Wooreera unaahala uhimeriya maloko othene. ¹¹ Vano mwakusiyaka wiira moolumaciye makhuce, nhoove itthu inhalenyu uhimya. Nanso nhimye itthu inhalenyu uvahiya ukati yooyo, kahi mweeco nyuva nnohala wuulumaca, nanso Nnepa Nttakattifu. ¹² Munna naahala unrweha unokhwani munnawe, ni athumwane mwanawe; ni asaana ammowuulumacera makhuce athumwanaya, mpaka weeva. ¹³ Ni nnaahala

wiinananyina nlatu wo ncina naka, nanso ntthu nohala ukhalana nthiti mpaka umwisoni, nowowoopwa.

Icuku yuulupale o Yutteya.

Mt 24.15-28; Lk 21.20-24

¹⁴ Moonaka citthu co miikho cikhumelelaka toko itankuleliyo wahimphwanelaya ukhala (nosoma uyo ee-weehe), vano ale ari uYutteya atthawele mmwakoni. ¹⁵ Ari wancarani ahikhuruwe hata ahikele mpani wiira akuse citthu caya. ¹⁶ Ari mmattani ahituruwele uwaani wiira yakuse coowara caya. ¹⁷ Atakhaliye pha ale ari ni irukulu, na ale anamwiha asaana mahuku ale! ¹⁸ Nswali wiira itthu ile ihiranye ukati weyiita. ¹⁹ Nlatu mahuku ale cohosiya cinkokhala toko caharyaya ukhalakaru, ikhumelo wapattusilyawe Nluku ittuniya, mpaka nnava, hata khacinkela cakhalaka tho. ²⁰ Ni yahari Apwiya akhuhaka mahuku ale, hata ntthu khoopwa, nanso nlatu wa atthu oothanliya naahala ukhuhveha. ²¹ Akhalaka ntthu nohimeryani: 'Mesiya ri vava!' atthuna, 'Umoone wonwo!', nhikupali, ²² kontha anaahala wunwa amesiya oowootha ni anapiyu oowootha ni ankopanka ikanyero ni cootikhineeha wiira yaathepye, wanooranyaya, hata oothanliya. ²³ Nanso nyu, mwisunke; kihohimeryani cothene marapururu.

Uwa wa Mwanawe Pinattamu.

Mt 24.29-31; Lk 21.25-28

²⁴ Nanso mahuku ale, anamanle mahuviho ale, ncuwa ninaahala uripela, ni mweeri khunhala waarya, ²⁵ itthoottwa cinaahala umora wirimu, ni ikuru conculu cinaahala upukunyiya. ²⁶ Vano naahala wooniya, awaka mmahutteni Mwanawe Pinattamu ni ikuru cuulupale ni waarya. ²⁷ Nahala waruma ancelo awe ni wathukumaniha atthu yathanlilyawe mittetthe co micese cophyoo, umalenlyaya ilapo nuumalenlyaya irimu.

Nlikanihero no mwiri wonhokorokho.

Mt 24.32-44; Lk 21.29-36

²⁸ Mwiitthuce, mweeco, nlikanihero no mwiri wonhokorokho. Miritta caya cakhalaka miheenyanya, ni capaceraka uphuwa, nhocuwela wiira iyiita iri vakhiviru. ²⁹ Ciicammo nyu, moonaka ukumelela citthu nnya, ncuwele wiira Mwanawe Pinattamu ri vakhiviru, wankhora. ³⁰ Khweeli kinawuhimeryani: Khanimmira nloko nna cihiraneele citthu cothene nnya. ³¹ Irimu ni ilapo cinaahala uvira, nanso moolumo aka kxanhala uvira.

Khaawo ancuwela nihuku hata ukati.

³² Nanso khaawo nocuwela nihuku nne, hata ukati ule, mena ancelo o wirimu, mena Mwana, nanso Athumwane paahi phincuwela. ³³ Nkhale miitho, nrontte! Nlattu khannocuwela nihuku ninhalaya uphiya ukati ule. ³⁴ Uri toko ntthu alakenle ikhwaha awe, ahiyaka inupa awe, ahaahiyera iyuulupale arumeyi awe, khula ntthu aho-vahiya nteko woovara, ni ahonlamulela mayokhaliha wiira arontte. ³⁵ Vano nrontte, nlattu khannocuwela ukati unhalaawe uwa mwaneene itthoko; toko yococilo, atthuna uhiyu iriyari, atthuna uneepile nthupi, atthuna wicisu, ³⁶ wahikhumelele wiira, nawile ni wututuserani, huphwanyeni nrupaka. ³⁷ Itthu inohimeryakani nyu, kinahimerya atthu othene: Nrontte!

14

Ayutta anawuulumaca makhuce.

Mt 26.1-5; Lk 22.1-2

¹ Yahanle mahuku meeli uphiya isukuhuulu yo Pasikuwa ni nihuku ninliyaya mikatthe coohimiropo, oolupale a mayasataka ni mayowantikha yanawaavya mananna unthuka wo makhuce numwiiva. ² Yanawiira:

Itthu ila ihiiriye mahuku osukuhuulu wiira atthu ayo ahipanke ipokoho.

Yesu nattikittheliya makhura oonukhela uPetaniya.

Mt 26.6-13; Yohani 12.1-8

³ Yesu nari uPetaniya, nonkomile wameeca mpani mwawe Simoni omakunttula, ahowa nthiyana, acisile iphotiri yo nluku ya alapasturo inheliya makhura oonukhela yeehaninya narttu, anthumihiya ncurukhu mwinci, napwesile iphotiri, aheethela makhura mmuru mwaYesu. ⁴ Nanso akina yahonyonyinya, yiirelanaka ayayooru: Ariheliyeni ciicammo makhura ala? ⁵ Yanawoorya uthumihiya ni ncurukhu iminya tharu, mpaka wakawela atthu oothwenya. Ni yahonkuphula nthiyana ule. ⁶ Yesu nanso aheera: Nhiyeke. Munkuphulelaka isiyani? Hokipankela itthu yooreera; ⁷ Kontha, atthu oothwenya phinakhalaneenyu, ni mwatthunaka nnawoorya waapankela cooreera, nanso miyano akinkhala ni nyu mahuku othene. ⁸ Ale ahopanka itthu yoonryaya. Ahoottiha ni makhura irutthu aka ahoolelihaka uvithiya waka kihinaaya ukhwa. ⁹ Khweeli kinawuhimeryani, wiira mwiilaponi mothene unhalaya ulalyaa Nhupi Wooreera, inaahala tho uhimiya itthu yapankilyawe wiira upuweleliye.

Yutta nawuuluma makhuce

Mt 26.14-16; Lk 22.3-6

¹⁰ Vano, Yutta Iskariyoti, mmoca mwaale khumi na eeli, akenle woolupale a mayasataka wiira amulume makhuce Yesu. ¹¹ Weewilyaya moolumo ale, cahaatteela mirima ni yahovanela ummaha nsurukhu. Yutta anawavya ukati wontumiha Yesu.

Yesu nawalyana Owiitthuca awe ikwaha yoomaliha

Mt 26.17-19; Lk 22.7-13

¹² Nihuku noopacera no mikatthe coohimiropo, ukati waveleelihiya mwakhontwa o Pasikuwa, owiitthuca yahonkoha Yesu: Nnotthuna ulokiheriya vayi nipuro noonlya Pasikuwa? ¹³ Ahaaruma owiitthuca eeli ni aheerela: Murwee uparasa. Nnaahala umphwanya ntthu oocisa mwaapu wo maasi. Muntthare, ¹⁴ ni unkelaawe, munhimerye mwaneene inupa: Mwalimu nakoha: Inupa inhalaka umaka iri vayi, kinlyaka Pasikuwa ni owiitthuca aka? ¹⁵ Ni naahala wuthonyerani nsana nuulupale uculu nooreerihya ni nowaaya; mwanilokihere nenno. ¹⁶ Akhumaka owiitthuca awe, yahorwaa uparasa, ni yahophwanya toko cahimeriyaya; ni yahontthonkomaniha Pasikuwa.

¹⁷ Wiila waya, Yesu ahophiya na owiitthuca awe khumi na eeli. ¹⁸ Anonkomacile alyaka, Yesu aheera: Khweeli kinawuhimeryani, mmoca mwa nyu, nolya ni mi, naahala ukuuluma makhuce. ¹⁹ Yahanca ucukulaca, yiirelanaka ayayoru: Kahi thi mi? ²⁰ Yesu ahaakhula: Phi mmoca mwa nyu khumi na eeli, nokilyana nttiisi nimoca. ²¹ Nlattu, Mwanawe Pinattamu narwa, toko cantikhelyawe, nanso natakhalia ntthu nohala unthumiha! Phatari ahiyariye.

²² Walyaya, Yesu ahokusa nkatthe ni nareerihile, ahomyaniha ni ahaavaha owiitthuca awe, eeraka: Nkuseke, nlyeke, ila phi irutthu aka. ²³ Wahoolo ahokusa ikikhompe, ahosukuru ni ahaavaha ni othene yahowurya. ²⁴ Ni ahaahimerya: Ila phi iphome aka, iphome yo waatana wonaanano, invuviheriya atthu enci. ²⁵ Khweeli kinawuhimeryani wiira akinhala tho uwurya yowiima ila yo viteera mpaka nihuku ninhalaka uwurya tho wumweneni wa Nluku. ²⁶ Aneepile ncipo, yahokhumaca arwaka umwako wo Olivera.

*Yesu nahimya wiira Peturu naahala unkhotta.
Mt 26.31-35; Lk 22.31-34; Yohani 13.36-38*

²⁷ Yesu ahaahimerya: Nyu othene, uhiyu ula, nnaahala uhiya ikupalelo nlattu wo miyano, kontha ihantikhiya: Kinanrakaliha nhakheli ni ikhontwaa cinkomwaryaca.*

²⁸ Nanso kinonwelenle, kimmowuhoolelani wokela uKalileya. ²⁹ Peturu aheera: Hata othene ahiye ikupalelo aya, nanso mi, mena. ³⁰ Yesu ahomwaakhula: Khweeli kinawuhimeryani, ilelo uhiyu ula, nthupi uhinaya wiipa imaara piili, unakikhotta imaara tharu. ³¹ Nanso Peturu ahopwahera wakhula ni ikuru eeraka: Hata kilamuliye ukhwa ni nyu, akinookhottani. Ni othene yahoolumaca ciicale.

Yesu uYetsemani

Mt 26.36-46; Lk 22.39-46

³² Yahorwaa nipuro neehaninya Yetsemani, ni Yesu ahaahimerya owiitthuca awe: Munkome vava mi kiswa-liko. ³³ Ahonkusa Peturu, Yakopu, ni Yohani, ni ahanca woova ni ucukula. ³⁴ Ahaahimerya: Nnepa aka unacukula, icuku yo nokhwa. Nkhale vava ni nrontte. ³⁵ Apwahaka vakani, ahowuluwela vathi ni ahoswali wiira wooryanyaa, ukati ula ukipwahe. ³⁶ Ni ahohimya: Apa, Tiithi; Nyu nnawoorya cothene. Nkitamihe mmahuvihoni! Nanso, cihipankiye cintthunaka, nanso cintthuneeenyu. ³⁷ Uturuwa wawe, aphwanyile arupaka, ni ahomwiirela Peturu: Simoni unarupa? Khawoonrye wiliphila iwora imoca? ³⁸ Mwiliphile ni nswaliko wiira nhithokociye. Nrima unatthuna ratta, nanso irutthu khinlipa. ³⁹ Ahorwaa tho uswalini, akulelaka moolumo yaayo. ⁴⁰ Ahoturuwa, ni ahaaphwanya arupaka kontha miitho aya yahocara ikhove. Ni khayoonona yomwakhula. ⁴¹ Ahowa imaara yoneeraru mpaka waahimerya: Mpaka nna nnaarupa ni nnamumula tho? Wahotosa! Ukati uhophiya. Mwanawe Pinattamu naahala

* 14:27 Zakariya 13.7

urwehiya mmatatani mwaatthu ookosakosa. ⁴² Muunwe, Nrwee! Kitumihile uyo hophiya.

Utthukiya wa Yesu.

Mt 26.47-56; Lk 22.47-53; Yohani 18.1-11

⁴³ Yesu oolumacaka nanlelo phaphilyawe Yutta, ari mmoca mwaale khumi na eeli, ni mphwinko muulupale wakhumile woolupale a mayasataka, mayowantikha ni mahumu ni warina ikatana ni ikopo. ⁴⁴ Namakhuce ahaahimerya ikanyero eeraka: Nohalaaka unkoha isalaama, phi yooyo, mumvare ni munkuse natthukiye ratta. ⁴⁵ Uphiya wawe, ahomwaattamerya ni ahomwiirela: Mwalimu! Ni ahonkoha isalaama. ⁴⁶ Yahommara Yesu, ni yahontthuka. ⁴⁷ Vano, mmoca mwaale eemenle wonwo, ahokumiha ikatana ahorakaliha ipottha ya nkhlupale a mayasataka, ahonthikila nnyaru. ⁴⁸ Yesu ahaahimerya: Nkhumile ni ikatana ni ikopo uwa ukitthuka, toko mayohukha. ⁴⁹ Kaari ni nyu mahuku othene mpani mwa Nluku, kiitthucihaka ni khamwakitthukile. Nanso wiira citthariheleliye toko caantikhiyaya. ⁵⁰ Vano, anhiyaka, othene yahotthawa.

⁵¹ Ni ahontthara mmirawo mmoca eekhunenele ikuwo. Yahommara, ⁵² nanso ahiyaka ikuwo ile, ahotthawa pwitipwiti.

Yesu upwaroni yo Ayutta

Mt 26.57-68; Lk 22.63-71

⁵³ Yahonrweha Yesu wankhlupale a mayastaka wathukumannyaya othene oolupale a mayasataka, mayowantikha ni mahumu. ⁵⁴ Peturu ahontthara uttayittayi mpaka nhina ipuwa ya nkhlupale a mayasataka. Peturu wonkomilyawe wamoca ni ananteko ootthaka mooro. ⁵⁵ Vano, oolupale a mayasataka ni mayothukumana othene yaavya osaahiti, wowiira amwiive Yesu, nanso khayaaphwanyile. ⁵⁶ Enci

yaanahimya cowootha, nanso cahimilyaya khaweerana.
⁵⁷ Ahaawo yeemenle ni uromola yowootha ila yiiraka:
⁵⁸ Hi nihomwiiwa ahimiyaka: Kinhala ukwanyula inupa
 ila, itekiye ni matata a atthu, ni mahuku mararu
 kinaahala uteka ikina yoohitekiya ni matata a atthu.
⁵⁹ Nanso, hata ciicammo usaahiti aya khaweeranne.
⁶⁰ Vano, muulupale o mayasataka aheemela iriyari aya
 atthu yathukumanne ni ahonkoha Yesu: Khunakhula
 itthu nhina osaahiti ommahaya atthu ala? ⁶¹ Yesu
 nanso ahomaala ni khaakhunle itthu. Muulupale a
 mayasataka ahonkoha tho: We uri Kristu, Mwana a
 Nluku Ooreerihya? ⁶² Yesu ahaakhula: Kiri mi, ni
 nnaahala umoona Mwanawe Pinattamu nonkomile
 moonoo nlopwana wa Nluku Okuru, ni awaka mmahutteni
 o wirimu. ⁶³ Vano, muulupale a mayasataka ahaahula
 coowara cawe ni aheera: Nimphevela tho yayi osaahiti?
⁶⁴ Mwanamwiiwa ukufuru nwo. Nneera cani? Na atthu
 othene yahonhukhumu ukhwa. ⁶⁵ Wahoolo, akina
 yaanapacera unsuwela, yahonkhunela wiitho ni ikuwo
 nuumwaatta yiiraka: Uhimyace nnapiyu! Ni mayorontta
 yahonkusa nuumwaattakaca.

Peturu nanruna Yesu

Mt 26.69-75; Lk 22.54-62; Yohani 18.15-18,25-27

⁶⁶ Peturu neemenle vate wapuwanu, ahophiya nanteko
 mwanthiyana a muulupale a mayasataka, ⁶⁷ ni umoona
 wawe Peturu ootthaka mooro, ahomwehecesa ni ahomwi-
 irela: We khweeli wari ni Yesu o Nasaree. ⁶⁸ Ule nanso
 ahoruna, eeraka: Akinoncuwela, hata akineeweha in-
 himyaa iyo. Wahoolo ahokhumela vate iluwani, ni nthupi
 wahepa. ⁶⁹ Nanteko mwanthiyana, umoona wawe tho,
 ahaahimerya atthu yaatamananyawe: Ula phi mmocar.
⁷⁰ Nanso ahoruna imaara yonapiili. Ukati vakani tho,
 ale yaari mmo, yahonhimerya Peturu: Khweeli we phi
 mmocar, kontha uri nkalileya. ⁷¹ Nanso aholapha ni

aholupela eeraka: Akinoncuwela ntthu nnomwaacenyu. ⁷² Ni nenna nna nthupi waheepa imaara yonapiili. Vano, Peturu ahoopuwela itthu yahimilyawe Yesu: Nthupi uhinaya wiipa imaara piili, we unaahala ukiruna imaara tharu. Ni vava ahopacera wunla.

15

¹ Usakaru, yahothukumana oolupale a mayasataka wamoca ni mahumu ni mayowantikha, ni mayonthukumanano othene; ni untthuka waya Yesu, yahonkusa ni yahommelela waPilatu.

² Pilatu ahonkoha: We uri Mwene a Ayutta? Yesu ahomwaakhula: We uhohimya. ³ Ni oolupale a mayasataka yahonriyelela citthu cinci. ⁴ Pilatu ahonkoha tho eeraka: Khunakhula itthu? Woone, citthu cinci cinriyeleliyaa na atthu ala. ⁵ Yesu nanso khaakhunle tho itthu, ni Pilatu ahotikhina.

Yesu ahohukhumwinya wiiviya

Mt 27.1-2,11-26; Lk 23.1-7,13-25; Yohani 18.28-19.16

⁶ Nihuku nosukuhuulu, Pilatu aholemalela untthukula nantthukiya mmoca yantthunaya atthu. ⁷ Ahaawo nlopwana mmoca, eehaninya Parapasi, atthukiye wamoca na anaporonka nlattu yamwiivile ntthu ukati wonkhitto. ⁸ Mphwinko wa atthu, wahonwa ni wahopacera ulepela itthu yalemalenlyawe wapankela. ⁹ Pilatu ahaakhula: Nnotthuna wiira kutthukuleleni Mwene a Ayutta? ¹⁰ Nlattu ahocuwela wiira oolupale a mayasataka yamwiihenre nlattu woonrama. ¹¹ Nanso oolupale a mayasataka yanatheperya mphwinko wiira phatari Pilatu antthukule Parapasi. ¹² Pilatu ahaakoha: Kinhala umwiiriha isiyani ula nnomwiihanenyu Mwene a Ayutta? ¹³ Na ale yankhuwaca tho: Unkhomele wansalapani! ¹⁴ Vano Pilatu aheera: Tthekileni? Nanso ale yanakhuwaca: Unkhomele

wansalapani! ¹⁵ Pilatu, atthunaka wamaaliha atthu ale, ahaataphulela Parapasi. Ni aholamula wiira Yesu apsuliye ni akhomeliye wansalapani.

Yesu nawapsuliya

Mt 27.27-31

¹⁶ Anakhotto yahonkusa upwaroni ya nsatoro, ni ya-heehaninya anakhotto othene. ¹⁷ Yahomwariha ihancu yookhwiila, ni yahomweesa ikhilempa yo miiwa wamuru wawe. ¹⁸ Wahoolo yahopacera unkoha nretele yiraka: Salaama, Mwene a Ayutta! ¹⁹ Yanamwaatta wamuru ni nthale ni yanansuwela ni ankhromelaka yananlapela. ²⁰ Wamanlyaya untarawaca yahonrula ihancu yokhwiila ni umwariha tho cawawe. Vano yahonkusa wiira akhome-liye wansalapani.

Yesu nakhomeliya wansalapani

Mt 27.32-44; Lk 23.26-43; Yohani 19.17-24

²¹ Yahommara athumwane Alisantere ni Rufu, eehaninya Simoni o Sirene aakhuma umawaani ni ahokanyererihya ukusa nsalapa. ²² Yahonrweha nipuro neehaninya Kolokootha, manaaya, nipuro nokohi. ²³ Yahommaha ivinyu yootakaniheriya ni miira, nanso ahokhotta uwurya. ²⁴ Wahoolo yahonkhomela wansalapani. Ni akawelanaka cowara cawe, yahopanka mwaavi wiira yoone yahalaawe uphwanya khula ntthu. ²⁵ Yaari iwora yoneeraru wakhomeliyawe wansalapani. ²⁶ Waculu wawe yahantikhiya yariyeleliyawe: MWENE A AYUTTA. ²⁷ Yahokhomeliya wamoca ni Ule, mayohukha eeli, mmoca, moono nlopwana, nkina moono nthiyana. ²⁸ Ciicammo cootthariheleliya cowantikhiya cineera: Ahaalikeliya na atthu oonanara nrima.* ²⁹ Atthu yaavira ayo, yananruwana, apukunyaka muru, yiraka:

* 15:28 Isaya 53.12

We! Watankulaca Inupa ya Nluku ni uteka tho mahuku mararu. ³⁰ We wicoopole o mwaneene nuukhuruwe wansalapani! ³¹ Oolupale a mayasataka ni mayowantikha yanateehana, yiraka: Hoopola akina ni khanoorya wicoopola mwaneene. ³² Akhuruwe naanano wansalapani uyo Kristu, Mwene o Israel, wiira nimooone ni ninkupali. Na atthu ale yakhomeliye ni Ule, yanaruwana.

Ukhwa wa Yesu

Mt 27.45-56; Lk 23.44-49; Yohani 19.28-30

³³ Waphilyaya ukati woothana ipiphi yahokhunela ilapo yothene mpaka yocoocilo. ³⁴ Uphiya waya yocoocilo Yesu ahokhuwa ni ncu noorunya: Eloi, Eloi, lama sapak-tani! Manaaya: Nluku aka! Nluku aka! Ukihiyenreni veekhaka? ³⁵ Umwiiwa waya, akina yaari wonwo, ya-heera: Moone, nomwiihana Eliya! ³⁶ Mmoca mwaale ahothimakaca uwiha ntthoce nooheliya makari ahot-thukelela muntathini ni ahommaha wiira awurye, ni ahohimya: Noone wiira Eliya nawa unkurusela vathi. ³⁷ Akhuwaka ni ncu noorunya, Yesu ahokhwa. ³⁸ Vano ikuwo yo Mpani mwaNluku yahaahuwa iriyariru ukhuma uculu mpaka vathi. ³⁹ Muulupale a anakhotto eemenle cooco wariyawwe Yesu, umoona wawe akhwaka ciicale, aheera: Khweeli ula ari Mwana a Nluku!

⁴⁰ Yahaawo tho athiyana yemenle uttayi amwehaka; mwaale ahaawo Mariya Mantalena, Mariya anumwane Yakopu mwankani ni Yosefi, ni Saloome. ⁴¹ Wariyawwe Yesu uKalileya yaayo yahontthara nunvarela nteko, ni athiyana akina enci yanvelenle wakenlyawe uYerusalemu.

Yesu navithiya mmahiyeni

Mt 27.57-61; Lk 23.50-56; Yohani 19.38-42

* 15:34 Macipo 22.1

⁴² Wiila waya, hapo wari ukati wowiitthenkaciya nihuku nontivela, ⁴³ ahowa Yosefi o Arimateya, humu oocuwanyaa ni oottitthima, akhuluvenle uwa waya omwene wa Nluku, alipile nrima wokela waPilatu ni aholepela nrutthu wa Yesu. ⁴⁴ Ni Pilatu ahaakaaka wiiwa wawe wiira hokhwa, ni amwiihanaka muulupale anakhotto ni ahonkoha akhala wiira khwile mwakhayayi. ⁴⁵ Ni nahimeriye ni muulupale uyo, nrutthu ahovahiya Yosefi. ⁴⁶ Yosefi nathumile ikuwo, ahokurusa nrutthu wansalapani, ni ahokhuneela ni ikuwo eyo. Wahoolo ahommitha mmahiye yathipiye wamwalani ni ahopirikisela nluku nuulupale wankhora wo mahiye. ⁴⁷ Mariya Mantalena, ni Mariya anumwane Yosefi yahoono nipuro navithiyawe.

16

Yesu honwelela

Mt 28.1-10; Lk 24.1-12; Yohani 20.1-10

¹ Uvira waya nihuku no ntivela, Mariya Mantalena, Mariya anumwane Yakopu ni Saloome yahothuma makhura oonukhela ni yahorwaa uttikitthela nrutthu wa Yesu. ² Wicisu ncuwa nikhumaka nihuku noopacera nosumana, yahorwaca umahiye. ³ Yanawaakaaka yiiraka: Tipani nokela unipirikisela nluku nno wankhora wo mahiye? ⁴ Nanso, awehaka, yahoono wiira nluku nopirikiseliya nceresere ni nari nluku nuulupale cinene. ⁵ Ukela waya mmahiye yahomoona mmirawo nonkomile moonoo nlopwana, awanre ihancu yooteela, ni yahotuthuwa. ⁶ Uyo nanso, ahaahimerya: Nhituthuwe. Nnomwavya Yesu o Nasaree akhomeliye wansalapani. Honwelela, khaawo va. Moone nipuro namweesilyaya. ⁷ Vano, murwee, mwahimerye owiitthuca awe ni Peturu

wiira Yesu naahala wuhoolelani uKalileya. Wonwo nnaahala umoona toko coohimenryaweni.

⁸ Akhumaka umahiye yanatthawa ni uthukumela nlatu wo woova. Khayanhimenrye ntthu itthu ile nlatu wo woova.

*Yesu aheeconeha
Yohani 20.11-18*

⁹ Nonwelenle, wicisu aya nihuku noopacera isumana, Yesu ahonkhumelela woopacera Mariya Mantalena, yola ankumihilyawe macini saapa. ¹⁰ Uyo ahorwaa wacuweliha ale yakhanle ni Yesu, yeetta acukulaka ni yiikhupanyaka. ¹¹ Ale nanso, wiiwa waya wiira Yesu ri nkumi, ni Mariya ahomoona, khayaakupanli.

¹² Wahoolo aheeconeha nnanna nkina wasilopwana eeli yeetta ni iphiro, arwaaka umawaani. ¹³ Ayo yahoturuwa wiira yacuwelihe akhwaya, nanso na ayo khayaakupanli.

*Yesu nawaakhumelela owiitthuca awe.
Lk 24.50-53; At 1.6-11*

¹⁴ Wahoolo waya, ahaakhumelela owiitthuca awe khumi na mmoca alyaka, ni ahaakuphula nlatu wohikupali ni uturumala waya nrima, kontha khayaakupanli ale yamoonne nonwelenle. ¹⁵ Ni aheerela: Murwee ilapo yothene mwaalake atthu othene ni Nhupi Wooreera. ¹⁶ Ntthu nohala ukupali ni upatisiya naahala woopwa, nanso ntthu hinhala ukupali, naahala uhukhumwiya. ¹⁷ Ikanyero cinhala waatthara atthu ookupali phi nnya: Mwancina naka, ankowomola minepa coonanara, ankowuuluma moolumo oonaanano; ¹⁸ ankovara inwaa, ni yawuryaka itthu yowiiva, khinhala wapanka itthu; ammwathatela matata aretta, na ale anaahala uvona.

¹⁹ Vano, Apwiya Yesu anoolumanne owiitthuca awe yahakheleliya wirimu, ni ahonkoma moonoo nlopwana wa

Nluku. ²⁰ Vano arumeyi yahokhuma ni yahorwaa ulaka mapuro othene ni Apwiya yahaakavihera, yoneehaka nulumo na Apwiya ni ikanyero cavelenle.

Makhuwa-Meetto do Novo Testamento
The New Testament in the Makhuwa-Meetto Language of
Mozambique

copyright © 1927, 2009 Wycliffe Bible Translators, Inc.

Language: Makhuwa-Meetto

Translation by: Wycliffe Bible Translators

Contributor: The Word For The World

O utilizador pode copiar e distribuir a obra.

You may copy and distribute the work.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-12-29

PDF generated using Haiola and XeLaTeX on 14 Jun 2022 from source files dated 13 Jun 2022

5f709f83-645e-56c9-a248-d710f5a5b2ab